

## EL SANTO EVANGELIO SEGUN SAN MARCOS

# TU'UN VA'A NI CHAA SAN MARCOS

---

### Juan, chaa skuánducha

**1** Yá'a kéj'á'á tú'un va'a máá Jesucristo, Se'e Dios. <sup>2</sup>Te súan ni chaa Isaías tutu, chi chaa jáni tu'un Dios ni kuu-de sáa: Kuni so'o-ró, chi tájí-rí ndajá'a-rí kuxnúu-de jaa-de sátu'a-de ichi-ro. <sup>3</sup>Te ndajá'a-ún, kana jaa-de onde nuu nú'un té'é: Sátu'a-ró íchi máá Jító'o-yo te sándóo-ró íchi-yá, achí-de, áchí Isaías. <sup>4</sup>Te Juan, ni skuánducha-dé onde nuu nú'un té'é. Te ni jani-de tu'un jánducha jíin tú'un nakani iní, náv'a sá'a Dios tuká'nu iní nuu kuáchi. <sup>5</sup>Te ni chakoyo taká ñayivi ndañúu Judea, jíin taká ñayivi núu Jerusalén. Te ni skuánducha-dé-i iní yucha Jordán. Te kánakani ndaa-i kuáchi-i yúan. <sup>6</sup>Te sa'ma ní nu'un Juan ni kuu ixí camello, jíin íin sánchii ñii nú'ni chii-de. Te ni yee-dé ndikuá'yú jíin ndúxi yokó yuku. <sup>7</sup>Te ni jani-de tu'un: Ichi yatá-rí vai in I'a kúñá'nu-ga vásá rúu, ja tú kúñá'nu-ri jukuíta ndee-ri te ndájí-rí ñii yí'i ndijan-yá, áchí-de. <sup>8</sup>Te ruu, chi jíin ndúcha skuánducha-rí róo jíná'an-ró, ko I'a-ún, chi jíin

Espíritu Santo skuánducha-yá róo, áchí Juan.

### Ja ní janducha Jesús ni sá'a Juan

<sup>9</sup>Te ni kuu kiví. Te Jesús, ni kenda-ya núu Nazaret ndañúu Galilea. Te ni janducha-yá ni sá'a Juan iní yucha Jordán. <sup>10</sup>Te ni nana-ni-ya iní nducha-ún. Te ni jini-ya já ní nuña andíví. Te Espiritu ni jungava sikí-yá nátu'un paloma. <sup>11</sup>Te ichi ándíví ní kenda in tu'un ni ka'an: Máa-ró kúu Se'e-ri, te kúndá'ú iní-ri róo. Te kúsi iní-ri jíin-ró. Achí.

### Sikí já ní jito nchaá tá'an Satanás jíin-yá

<sup>12</sup>Yúan-na te máá Espiritu, ni chundá'á-ni-ya kuá'an-ya ondé nu'un té'é. <sup>13</sup>Te ni kanchaa-ya núu nú'un té'é yúan uu xiko kiví, te vásá ní jito nchaá tá'an Satanás jíin-yá. Te ni kandee-ya jíin kíti xáan. Te máni ndajá'a ándíví ní kajatínu nuu-yá.

### Ndasa ni kej'á'á Jesús jáni-ya tú'un

<sup>14</sup>Yúan-na te onde ni kiví Juan vekaa, te ni jaa Jesús ndañúu

Galilea, jáni-ya tú'un va'a Dios. <sup>15</sup>Te ni kachi-ya: A ni jinu kivi, te a yani koo nuu nuu tá'ú Dios tiñu. Nakani ini jíná'an-ró, te kandíja-ró tú'un va'a-ya.

**Ja ní kana-ya xiní kúun tá'an cháa**

<sup>16</sup>Te ni ja'a-ya xíin mar Galilea kua'an-ya. Te ni jini-ya núu Simón jíin nání-de Andrés, káskuíta ka'nu-de nunu-dé ini mar, chi cháa kátiin tiyáká kákuu-de. <sup>17</sup>Te ni ka'an Jesús jíin-de: Kundikin ruu kikoyo-ró, te ná násá'a-ri róo cháa tiin ñayivi. Achí-ya. <sup>18</sup>Yúan-na te ni kaxndóo-ni-de nunu-dé. Te ni kandikin-de-ya. <sup>19</sup>Te ni jika-ya íin tí'lí-ga. Te ni jini-ya núu Jacobo jíin nání-de Juan. Se'e Zebedeo kákuu cháa-ún. Suni ká'jin cháa-ún ini barco, kánaku'ni-de nunu-dé. <sup>20</sup>Te ni kana-ni-ya xiní-dé. Te ni kaskéndo-de táa-de Zebedeo ini barco-ún jíin mozo-de, te kuangoyo-de yata-yá.

**Ja ní keñi'in-ya tachí káni**

<sup>21</sup>Te ni kivi koyo-de ini nuu Capernaum. Te taká kivi ndétatú ni kivi-ni Jesús ini ve'e sinagoga, te ni stá'an-ya tú'un. <sup>22</sup>Te ni kanaa ini-i kájni so'o-i tu'un stá'an-ya, chi ni stá'an-ya nátu'un cháa ndíso tíñu, nasu nátu'un cháa káchaa tutu. <sup>23</sup>Te ini ve'e sinagoga-ún kándeé iin cháa tá'an tachí káni. Te cháa-ún, ni kana kó'ó-de: <sup>24</sup>Naún kuní-ní jíin-ná jíná'an-ná, Jesús nuu Nazaret. Vai-ní xnáa-ní náa náún. A jiní-ná na ní kúu, cháa ío ndoo nuu Dios, achí. <sup>25</sup>Te Jesús, ni ka'an xa'an-yá jíin: Kasu yu'u-ro, te kenda-ró-de, achí-ya. <sup>26</sup>Te máa

tachí káni-ún, xa'an ní ja'ni yí'í chaa-ún. Te ni kana jíkó'ó. Te ni kenda kua'an ini-de. <sup>27</sup>Te ndivii-í ni kanaa ini-i kánde'é-i. Te kándatu'ún máa-i: Naún kúu ya'á. Tu'un jáa kúu náún, chi tá'ú ní'in-de tiñu nuu tachí káni, te káandatu nuu-dé, achí-i. <sup>28</sup>Te ni jicha nuu-ni tu'un-ya kuá'an ní taká ndañúu ja ní jíkó ndúu yu'úu Galilea. <sup>29</sup>Te ni káandenda-ni-ya ini ve'e sinagoga. Te ni chakoyo-ya jíin Jacobo jíin Juan onde ve'e Simón jíin Andrés. <sup>30</sup>Te náchisó Simón, kátuu-ñá yí'í kiji-ña. Te ni kaka'an-ni-de jíin-yá ndasa kuu máa-ña. <sup>31</sup>Yúan-na te ni jaa-ya. Te ni tiin-ya ndá'a-ñá. Te ni ndukani-ya-ñá. Te ni kee-ni kiji-ún-ña. Te ni jatíñu-ña núu-ya jíná'an-ya.

**Ja ní nasáva'a-ya kuá'a ñayivi káku'u**

<sup>32</sup>Te nuu ní ini, ni kee ndikandii, te ni chakoyo cháa kándiso ñayivi káku'u, jíin ñayivi tá'an tachí káni. <sup>33</sup>Te taká ñayivi núu-ún, ni kakutútú-i yuxé'é yúan. <sup>34</sup>Te ni nasáva'a-ya kuá'a ñayivi káku'u tini nuu kué'e. Te ni kiñi'in-ya kuá'a tachí káni kája'an. Te tú ní já'a-ya tú'un ka'an tachí káni-ún, chi a kájni-ún-yá.

**Ja ní jikan ta'u-yá nuu nú'un té'é**

<sup>35</sup>Te ña'an xa'an ní ndukoo-ya, onde ná ñnaa-gá. Te ni kenda-ya te kua'an-ya íin lugar ñu'un té'é. Te yúan ni jikan ta'u-yá. <sup>36</sup>Te Simón jíin cháa káxiukú jíin-de, ni kandikin-de-ya. <sup>37</sup>Te ni kanani'in-dé-ya. Te káka'an-de jíin-yá: Taká ñayivi, kánandúkú-i ní, achí-de. <sup>38</sup>Te ni kachi-ya jíin-de:

Ná kí'on sáva-ga ñuu káxiukú yáni, náv'a kani-ri tu'un yúan, chi ja yúan ní chaa-ri. Achí-ya. <sup>39</sup>Te kua'an-ya. Te ni jani-ya tú'un iní taká ve'e sinagoga ní ndáñú Galilea. Te ni kiñi'in-ya tachí káni kája'an.

**Ja ní nasáva'a-ya ñin chaa té'yu ndi'yi**

<sup>40</sup>Te ñin chaa té'yu ndi'yi, ni chaa-de nuu-yá. Te ni jukuiñi jítí-de nuu-yá, ká'an nda'ú-de jíin-yá: Nú kuni-ní, te kuu nasándoo-ní náá, áchí-de. <sup>41</sup>Te Jesús, ni kundá'ú iní-ya-dé. Te ni skáa-ya nda'a-yá. Te ni ké'é-yá-de. Te ni ka'an-ya jíin-de: Kuni-ri. Ná ndúndoo-ró. Achí-ya. <sup>42</sup>Te máá súan-ni ni ka'an-ya, te ndi'yi té'yu chaa-ún, kua'an-ni. Te ni ndundoo-ni-de. <sup>43</sup>Yúan-na te ni ka'an xa'an-yá jíin-de. Te táji-ni-ya-dé ki'in-de. <sup>44</sup>Te ká'an-ya jíin-de: Koto-ró, ma ká'an kuti-ro jíin ní ñin-i, chí kuá'an, te stá'an-ro máá-ró núu sutú. Te kundá'a-ró ndátíñu stá'an-ro núu-dé, náv'a kuni-de ja ní ndundoo-ró, nátu'un ní tá'ú Moisés tíñu sáá, áchí-ya. <sup>45</sup>Ko máá-de, ni kenda-de kua'an-de. Te ni kejá'a-de ni jacha xa'an-dé tu'un. Te ni kachi-de ná ni ta'an-de. Te tuká-ni ní kúu kivi ndijin Jesús onde iní ñuu, ko ni kanchaa siin-ya ñin lugar ñu'un té'é. Te yúan ni kikoyo ñayivi táká lado nuu-yá.

**Chaa ni kuyúnú**

**2** Te ni kuu yakú kivi. Te ni kivi tuku-ya ñuu Capernaum. Te ni kenda tu'un ja vé'e kanchaa-ya. <sup>2</sup>Te ni kakutútú kuá'a xa'an ñayivi núu-yá. Te tuká ní kánda

kuti yúx'é kufni-i. Te ni jani-ya tú'un nuu-í. <sup>3</sup>Yúan-na te ni chaa yakú chaa nuu-yá jíin ñin chaa ni kuyúnú, ja kúun tá'an-de kándiso-de chaa-ún. <sup>4</sup>Te ja kuá'a ñáyivi-ún, te tú ní kúu kivi-de nuu-yá jíin chaa-ún. Te ni kajuña-de xiní vé'e nuu kánde-ya-ún. Te nuu ní kakaan-de yau-ún, ni kaskúun-de jito yuu núu kátúu chaa ni kuyúnú-ún. <sup>5</sup>Te ni jini Jesús ja kákandíja máá-de. Te ni ka'an-ya jíin chaa ni kuyúnú-ún: Hijo, a ío tuká'nu iní nuu táká kuachi-ró, áchí-ya. <sup>6</sup>Te yúan káxiukú yakú chaa káchaa tutu. Te yúan, ni kajani iní: <sup>7</sup>Naja ká'an chaa yá'a súan. Núsáa te tu'un ndiva'a ká'an-de. Ndéja kúu sá'a tuká'nu iní nuu kuáchi, chí ñin-ni máá Dios, áchí. <sup>8</sup>Te ni juku'un-ni iní Jesús ja súan kájani iní. Te ni ka'an-ya jíin: Naja kájani iní-ro súan. <sup>9</sup>Te ja úu tu'un yá'a, ndéja yí-ga káa. Á ka'an-ri jíin chaa ni kuyúnú yá'a: A ío tuká'nu iní nuu táká kuachi-ró; xí ká'an-ri jíin-de: Ndukoo, te naki'in-ró jito yuu-ro, te ki'in-ro jíin, achi-ri náún. <sup>10</sup>Ko náv'a ná kuni-ro ja máá Sé'e chaa, ndíso-ya tíñu iní ñuyívi yá'a ja sá'a-ya tuká'nu iní nuu kuáchi, te ná ká'an-ri inga tu'un jíin chaa ni kuyúnú yá'a núsáa: <sup>11</sup>Jíin-ró ká'an-ri: Ndukoo, te naki'in-ró jito yuu-ro, te no'on-ro vé'e-ró, áchí-ya jíin-de. <sup>12</sup>Te máá chaa-ún, ni ndukoo-ni-de. Te ni naki'in-de jito yuu-dé. Te ni ndenda-de kua'an-de nuu ñayivi kuá'a-ún. Te ndivii-í, ni kakee nuu-í kánde'é-i. Te ni kanakana jaa-i Dios: Na tú kájiní kuti-yo súan nátu'un ya'a, áchí-i.

### **Ja ní kana-ya xini Leví**

<sup>13</sup>Te ni kenda tuku Jesús kua'an-ya onde yu'u mar. Te taká ñayivi, ni jakoyo-i nuu-yá. Te ni stá'an-ya tú'un nuu-í. <sup>14</sup>Te ni ja'a-ya kuá'an-ya. Te ni jini-ya núu Leví, se'e Alfeo, kánchaa-de nuu kútútú xú'ún ñúu. Te ni ka'an-ya jíin-de: Kundikin-ro rúu, áchí-ya. Te ni ndukuiñi-de. Te ni ndikin-de-ya. <sup>15</sup>Te Jesús, ni yee-yá staa iní ve'e-de. Te suni kua'a cháa xini jíin cháa ká'io kuachi, káyee-dé staa jíin Jesús jíin cháa káskuá'a jíin-yá, chi ío kua'a-dé kándikin-de-ya. <sup>16</sup>Te chaa káchaa tutu, jíin cháa fariseo, kánde'é-de ja yee-yá staa jíin cháa xini jíin cháa ká'io kuachi. Te ni kaka'an-de jíin cháa káskuá'a jíin-yá: Naja yee-yá jí'i-ya jíin cháa xini jíin cháa ká'io kuachi, áchí-de. <sup>17</sup>Yúan-na te ni jini so'o Jesús. Te ni ka'an-ya jíin-de: Chaa ká'io ndáján, tú kánandi'i-de chaa táná, chi chaa kaku'u kuu ja kájinu ñú'ún. Na tú vai-ri kana-ri xini cháa ndaa, chi chaa ká'io kuachi kána-ri xini, áchí-ya.

### **Siki ja kondichá iní**

<sup>18</sup>Te chaa káskuá'a jíin Juan, jíin ja káskuá'a jíin cháa fariseo, ká'io ndichá iní-de. Te ni chakoyo chaa-ún. Te ni kaka'an-de jíin-yá: Chaa káskuá'a jíin Juan jíin ja káskuá'a jíin cháa fariseo, naja ká'io ndichá iní-de, te chaa káskuá'a jíin-ní, tú ká'io ndichá iní-de, áchí-de. <sup>19</sup>Te Jesús, ni ka'an-ya jíin-de: Á kuu kondichá iní ñayivi ká'jin viko tánda'a, te nú kánchaa yii jíin-i. Chi nú nini kánchaa yii

jíin-i, ma kuu kondichá iní-i. <sup>20</sup>Ko chaa ñin kivi ja yíi-ún, kuxio-de nuu-í. Te kivi-ún, kuu kondichá iní-i. <sup>21</sup>Tú ni ñin nachu'un sa'ma jáá núu sú'nu tu'ú. Chi nú súan, te suni máá ja ní nuku'un jáá-ún ka'nchaa-ga ja tu'ú-ún, te ja te'ndé-ún ví'i-gá te'nde. <sup>22</sup>Te tú ni ñin chu'un vino jáá iní ñii tu'ú. Chi nú súan, te máá vino jáá-ún ndátá ñii-ún, te kati vino-ún, te ñii-ún naa-ní. Ko ñii jáá jíin vino jáá, kuu ja kuu ku'un, áchí-ya.

### **Ja ní kakachi-de yoko trigo kivi ndetatú**

<sup>23</sup>Te ñin kivi ndetatú ni ja'a Jesús kua'an-ya ñin nuu kaa trigo. Te chaa káskuá'a jíin-yá, kájika-de kua'an-de. Te kakachi-de yoko. <sup>24</sup>Yúan-na te chaa fariseo, ni kaka'an-de jíin-yá: Naún kuu jian. Naja kásá'a-de súan kivi ndetatú, chi tú ío ley. Achí-de. <sup>25</sup>Te máá-yá, ni ka'an-ya jíin-de: Á tú ní kaka'u kuti-ro tutú naún ní sá'a David, kivi ní kii tundó'o nuu-dé. Te ni ji'i-de soko, onde jíin cháa ni kaxiukú jíin-de. <sup>26</sup>Te ni kivi-de iní ve'e Dios. Te Abiatar ni kuu máá sutú ñá'nu-ga. Te ni yee-dé statilá ii kaxiukú ndijín, ja tú ío ley kee ní ñin chaa, chi máni sutu káyee núu. Te suni ni ja'a-de nuu cháa kaxiukú jíin-de, áchí-ya. <sup>27</sup>Te suni ni ka'an-ya jíin-de: Kivi ndetatú ni jungoo ja siki cháa; nasu cháa ja siki kivi ndetatú. <sup>28</sup>Núsáa te máá Sé'e chaa, suni Jito'o kivi ndetatú kuu-ya, áchí-ya.

### **Ñin chaa ni ichi nda'a**

**3** Te inga jínu ni ndívi Jesús iní ve'e sinagoga. Te yúan ni ío

iin cháa n̄i ichi káján iin nda'a-dé.  
<sup>2</sup>Te kánde'é-de nú nasáva'a-ya-dé  
 kivi ndétatú, náva'a kakan-de  
 kuachi siki-yá. <sup>3</sup>Yúan-na te n̄i  
 ka'an-ya jín cháa kátí'ichi nda'a-ún:  
 Ichi má'nú yá'a jukuini-ro, áchí-ya.  
<sup>4</sup>Te n̄i ka'an-ya jín-de jíná'an-de:  
 Ndé ley ío siki kivi ndétatú. Á sá'a  
 va'a-yó, xí sá'a ñáá-yo. Á nama-yó  
 iin cháa a yani kuu, xí ká'ni-yo  
 iin ndiyi, áchí-ya. Te máá-de, tú  
 ní káka'an kuti-dé. <sup>5</sup>Te ndé'é-yá  
 nuu-dé ja ká'iin-de xiin-yá. Te n̄i  
 kití iní-ya. Te n̄i kuku'ía iní-ya já  
 ndáva iní añú-de jíná'an-de. Te n̄i  
 ka'an-ya jín cháa-ún: Skáa nda'a-ro,  
 áchí-ya. Te n̄i skáa-de nda'a-dé.  
 Te nda'a-dé-ún, n̄i nduva'a i-i-ní.  
<sup>6</sup>Yúan-na te n̄i kenda koyo cháa  
 fariseo. Te n̄i kandatu'ún-ni-de  
 jín cháa herodiano siki-yá, ndasa  
 ka'ni-dé-ya.

#### Kua'a ñáyivi ní kandikin-i-ya

<sup>7</sup>Te Jesús, n̄i kusfin-ni-ya  
 kuá'an-ya ondé yu'u mar jín cháa  
 káskuá'a jín-yá. Te ñáyivi kuá'a  
 xáan ndáñúu Galilea jín ndáñúu  
 Judea, n̄i kandikin-i-ya. <sup>8</sup>Te suni  
 onde ñuu Jerusalén jín Idumea, jín  
 ingá lado yucha Jordán, jín ndáñúu  
 Tiro jín Sidón. Kua'a xáan ñáyivi,  
 n̄i kajini tu'un-i ná ñá'nu tiñu n̄i  
 sá'a-ya. Te n̄i chakoyo-i nuu-yá.  
<sup>9</sup>Te n̄i ka'an-ya jín cháa káskuá'a  
 jín-yá ja ná kót'u'a iin barco lúlí  
 kivi-ya, náva'a tú kaxin-i-ya. Chi  
 kua'a xáan ñáyivi-ún ío. <sup>10</sup>Chi n̄i  
 nasáva'a-ya ñáyivi kuá'a. Te taká  
 ñáyivi kaku'u kue'e, n̄i kakandita-i  
 nuu-yá, ja ké'é-i-ya kákuni-i. <sup>11</sup>Te  
 tachí káni nú n̄i kajini nuu-yá, te  
 kájukuini jítí núu-yá. Te kákana

kó'ó: Máá-ní kúu Se'e Dios, áchí  
 jíná'an. <sup>12</sup>Ko máá-yá, n̄i ka'an  
 xa'an-yá jín já ná tú stá'an  
 ndijin-ún-yá.

#### Ja ní kaji-ya uxí uu cháa skuá'a jín-yá

<sup>13</sup>Te n̄i kaa-ya kuá'an-ya ondé  
 yuku. Te n̄i kana-ya xiní ndé cháa  
 játa'an iní máá-yá. Te n̄i jakoyo-de  
 nuu-yá. <sup>14</sup>Te n̄i jani-ya uxí uu tá'an  
 cháa, kuiñi-de jín-yá. Te tájí-yá-de  
 kingoyo-de kani-de tu'un. <sup>15</sup>Te  
 kundiso-de tiñu ja násáva'a-de  
 ñáyivi kú'u. Te kiñi'in-de tachí  
 káni kingoyo. <sup>16</sup>Te Simón, n̄i  
 naskúnání-yá-de Pedro. <sup>17</sup>Te Jacobo,  
 se'e Zebedeo, jín Juan ñani Jacobo,  
 n̄i naskúnání-yá ndendúu-de  
 Boanerges, ja kuní ka'an: Cháa  
 nátu'un taja. <sup>18</sup>Te sava-ga-de  
 nání-de Andrés, Felipe, Bartolomé,  
 Mateo, Tomás, Jacobo se'e Alfeo,  
 Tadeo, Simón ñuu Caná, <sup>19</sup>onde jín  
 Judas Iscariote, ja ní nastúu-de-ya.  
 Yúan-na te n̄i kivi koyo-de iin ve'e  
 jín-yá. <sup>20</sup>Te n̄i ndutútú tuku kua'a  
 ñáyivi. Te ni tuká ní kúu kee-yá  
 staa jín-de. <sup>21</sup>Te n̄i kajini tu'un  
 tá'an-ya. Te n̄i kakenda-de vai-de  
 ja tñin-de-ya. Chi n̄i kaka'an-de:  
 Kaku'u-de, áchí-de.

#### Tu'un ndiva'a siki Espiritu Santo

<sup>22</sup>Te ja káchaa tutu, n̄i kikoyo  
 onde ñuu Jerusalén, n̄i kaka'an:  
 Yí'i-de Beelzebú. Te jín tachí káni  
 ñá'nu káni'in-de tachí káni kája'an,  
 áchí. <sup>23</sup>Te n̄i kana-ya xiní jíná'an.  
 Te n̄i ka'an-ya tú'un yátá jín: Ndasá  
 kuu kiñi'in Satanás-ún Satanás kí'in,  
 áchí-ya. <sup>24</sup>Te nú iin ñuu sásfin máá  
 te kánakuatá'an máá, te ñuu yúan

ma kúni'in. <sup>25</sup>Te nú iin ve'e sásfín máá te kánakuatá'an máá, te ve'e yúan ma kúni'in. <sup>26</sup>Te nú Satanás kánakuatá'an máá te sásfín máá, ma kúni'in, chi sasua naa, áchí-ya. <sup>27</sup>Tú ni iin chaá kuu kivi-de ini ve'e chaá kándáján te sakuí'ná-de ndatiñu, te nú tú xna'an-ga ku'ni-de chaá ndáján-ún. Yúan-na te kuu sakuí'ná-de ndatiñu chaá-ún. <sup>28</sup>Jandáa ká'an-ri jíin-ró já koo tuká'nu ini nuu táká kuachi kásá'a chaá, te suni nuu tú'un ndiva'a nú nani ka'an-de jíná'an-de. <sup>29</sup>Ko nú iin chaá ká'an-de tu'un ndiva'a sikí Espiritu Santo, ma koo kuti tuká'nu ini-ya núu-dé, chi sua kundiso-de kuachi ní káni, áchí-ya. <sup>30</sup>Chi ni kaka'an-de: Tá'an-de tachi káni, áchí-de.

#### Náa-ya jíin ñaní-ya

<sup>31</sup>Te ni chaá náa-ya jíin ñaní-ya, te ká'iin-ña yatá ké'e. Te ni katáji-ña tú'un kua'an kákana-ña xiní-yá. <sup>32</sup>Te ñayivi kuá'a káxiukú ní núu-yá-ún, ni kaka'an-i jíin-yá: Kuánde'é-ní, chi ni chaá náa-ní jíin ñaní-ní ká'iin-ña yatá ké'e kánandúkú-ña ní, áchí-i. <sup>33</sup>Te máá-yá, ni ka'an-ya: Ndéja kúu náa-ri te ndéja kákuu ñani-ri, áchí-ya. <sup>34</sup>Te ndé'é-yá nuu ñayivi káxiukú ní núu-yá-ún, te ni ka'an-ya jíin-i: Kuni so'o-ró, chi ya'á kúu náa-ri jíin ñani-ri. <sup>35</sup>Chi ñayivi skíkuu tiñu kuní Dios, jian kúu ñani-ri, kúu ku'a-ri, kúu náa-ri, áchí-ya.

#### Tu'un yatá sikí cháa sáka trigo

**4** Te yu'u mar ni keja'á tuku-ya ní stá'an-ya tú'un. Te ni

kandutútú kuá'a xaán ñayivi núu-yá. Te ja yúan ní kivi-ya ní jungoo-ya ini iin barco nuu mar. Te taká ñayivi-ún, ni kakendoo-i káxiukú-i nuu ñú'un. <sup>2</sup>Te ni stá'an-ya kuá'a tú'un yatá núu-í. Te ni ka'an-ya jíin-i: <sup>3</sup>Kuni so'o te kuni-ro: Hin chaá sáka trigo, ni kenda-de sáka-dé. <sup>4</sup>Te ni kuu ja ní kenda-de sáka-dé, te iin nuni-ún, ni jungava yu'ichi. Te ni chaá tisaa. Te ni kakókó-tí. <sup>5</sup>Te inga, ni jungava nuu ñú'un yúu, nuu tú ío kua'a ñú'un. Te ni kana yachi-ni, chi tú ío kókon ñu'un. <sup>6</sup>Te nuu ní kana ndikandii, te ni kasun-ni. Te ni ichi, chi tú yo'o ní ío. <sup>7</sup>Te inga, ni jungava ma'ñú ínu. Te ni ja'nu iñu-ún. Te ni jasú nuu. Te tú ní kúun nuni. <sup>8</sup>Te sava, ni kajungava nuu ñú'un vá'a. Te ni kaja'nu. Te ni nakoko. Te ni kuun nuni. Hin ja okó uxi, inga ja uní xiko, te inga ja hin ciento, áchí-ya. <sup>9</sup>Yúan-na te ni ka'an-ya jíin-de: Chaá ío so'o kuni ná'ín, te ná kúni so'o-de. <sup>10</sup>Te nuu ní ndoo máa-na-ya, te chaá ká'iin yani nuu-yá jíin ndí'uxi uu chaá káskuá'a jíin-yá, ni kajika tu'un-de-ya sikí tú'un yatá-ún. <sup>11</sup>Te ni ka'an-ya jíin-de: A kuajuku'un ini-ro tú'un yisa'í yá'a, ndasa koo ñuu nuu tá'ú Dios tiñu. Ko jíin já sfin sikí ká'iin, chi máni jíin tú'un yatá ká'an-ri taká tu'un. <sup>12</sup>Náva'a vasa kánde'é, ná ndé'é ko ma chú'un ini. Te vasa kájiini so'o, ná kúni so'o ko ma júku'un ini. Náva'a ma ná jó káva ini, te koo tuká'nu ini nuu táká kuachi, áchí-ya. <sup>13</sup>Te ni ka'an-ya jíin-de: Tú kájuku'un ini-ro tú'un yatá yá'a náún. Ndasa júku'un ini-ro sáva-ga tu'un yatá núsáa. <sup>14</sup>Chaá sáka trigo kúu chaá

sáka tú'un. <sup>15</sup>Te nuni ní kajungava yu'íchi kákuu cháa ni saká tú'un ini-de. Ko nú ni kajini so'o-de, te cháa-ni Satanás te jánchaa-ni tu'un ni saká ini añú-de-ún kua'an-ni jíin. <sup>16</sup>Te nuni ní saká núu ñú'un yúu, kákuu cháa kájini so'o tu'un, te kúsiñ ini-de jíin. <sup>17</sup>Ko túu nuu káka yo'o ini-de. Te yakü-ni kivi kánda. Te nú ni ndonda tundó'o siki-dé, xí nú ni sándiva'a-i jíin-de siki tú'un-ún, te kánayú'u-ni-de. <sup>18</sup>Te nuni ní saká má'ñú ñnu kákuu cháa kájini so'o tu'un. <sup>19</sup>Ko kákutēnu-de jíin ndatíñu-de. Te kákuni-de kukúká-de, te káxndá'u-de máá-de jíin. Te kákutóo ini-de siki sáva-ga ndatíñu. Ndí'i yá'a sátēnu-de te jasú nuu tú'un-ún, te tú kúun nuni. <sup>20</sup>Te nuni ní saká núu ñú'un vá'a kákuu cháa kájini so'o tu'un. Te kájatá'u-de te kája'a-de nuni. ñin-de oko uxí, inga-de uni xiko, te inga-de ñin ciento, áchí-ya.

### Tu'un yiti

<sup>21</sup>Te suni ni ka'an-ya jíin-de: Á jukuiñi yiti já kundiñi sa'í chii nundóo, xí chíi jito. Á tú kundiñi nuu candelero. <sup>22</sup>Chí tú ío ni ñin tiñu yisa'í sáni, chí taká-ni stá'an ndijin-ya. Ni tú ío ni ñin tu'un yisa'í sáni, chí taká-ni vai ndijin sá'a-ya. <sup>23</sup>Chaa ío so'o kuni ná'in, te ná kúni so'o-de, áchí-ya. <sup>24</sup>Te suni ni ka'an-ya jíin-de: Ná kúni so'o va'a-ró. Chí jíin kú'a ja káchikuá'á-ro, suni nakukua'á-ro. Te ndaa-ga siki máá-ró já kájini so'o-ró. <sup>25</sup>Chí cháa ja á ñáva'a, te kii-ga nuu-dé. Te cháa ja ná tú ñáva'a, vasa ja á ñáva'a-de-ún te kuxio ki'in, áchí-ya.

### Tu'un tata ni ja'nu

<sup>26</sup>Te ni ka'an-ga-ya: Ñuu nuu tá'ú Dios tiñu kúu nátu'un ñin cháa ni chí'i-de tata nuu ñú'un. <sup>27</sup>Te kixí-de ñúu te ndúko-de ndúu. Te tata-ún a kána te já'nu. Te máá-de, tú jiní-de ndasa sá'a. <sup>28</sup>Chí máá ñú'un kúu ja já'a nuni. Xna'an-ga viu, te vasa kána yoko. Yúan-na te nuni ndoo chíi yoko-ún. <sup>29</sup>Te nú ni kuaan nuni-ún, te skivi-ni-de jóso, chí a ni jaá kivi tá'nu, áchí-ya.

### Tu'un ndikin yuá mostaza

<sup>30</sup>Te ni ka'an-ya: Na jíin ká'an-yo já ndasa kuni koo ñuu nuu tá'ú Dios tiñu. Xí na tu'un yátá skétá'an-yo jíin. <sup>31</sup>Kúu nátu'un ndikin yuá mostaza ja nú ni jichá nuu ñú'un, te yuán kúu ñin tata lúli-ga vasa táka tata ío nuu ñú'un-ún yá'a. <sup>32</sup>Ko nú a ni jichá. Te kana, te já'nu xa'an-gá vasa táka-ga yuá. Te kúná'nu nda'a. Te tisaá ío andíví vatu-ni sá'a-tí taká-tí chíi kati-ún, áchí-ya. <sup>33</sup>Te kua'a tú'un yátá súan ni ka'an-ya jíin ñayivi, ndasa ni kakanda máá-i kuni so'o-i. <sup>34</sup>Te nú tú tu'un yátá te tú ká'an-ya jíin-i. Chí máni máá-ni nuu cháa kaskuá'a jíin-yá ni kachi kají-yá taká tu'un.

### Ja ní jukuiñi tachi xa'an ní sá'a-ya

<sup>35</sup>Te ni ini kivi-ún. Te ni ka'an-ya jíin-de: Ná kija'a-yo íchi lado-ún, áchí-ya. <sup>36</sup>Te ni kaxndóo-de ñayivi kuá'a-ún. Te súan-ni ni kajaka-de-ya iní ñin barco. Te suni kua'an yakü-ga barco lúli jíin-yá. <sup>37</sup>Te ni ndonda ñin tachi xa'an. Te suni ni ndonda su'ma mar, ni kivi iní barco-ún. Te barco-ún kuni chítu ndúcha iní

núu. <sup>38</sup>Te máá-yá, kándeeyá ondé yata barco-ún, kixí-yá sikí ñin sa'ma yí'i xini. Te ni kaxndúkoo-de-ya. Te kaka'an-de jíin-yá: Maestro, á tú nákaní iní-ní ja náa-yo, áchí-de. <sup>39</sup>Te ni ndukoo-ya. Te ni ka'an xa'an-yá nuu tachí-ún. Te ni ka'an-ya jíin mar-ún: Ná'ín-ni koo-ró, jukuini, áchí-ya. Te ni jukuini tachí-ún, te ná'ín yúu íi-ní ni kuu. <sup>40</sup>Te ni ka'an-ya jíin-de: Naja káyu'ú-ro. Naja tú kákandíja-ró, áchí-ya. <sup>41</sup>Te ni kayu'ú xa'an-dé. Te ni kaka'an-de: Nde cháa kúu cháa yá'a núsáá, ja ondé tachí jíin mar kájandatu nuu-dé, áchí-de.

#### Chaa tá'an tachí káni ndañú Gadara

**5** Te ni jakoyo-ya ingá lado mar ndañú Gadara. <sup>2</sup>Te ni kenda-ya iní barco-ún. Te onde ve'e añu ni kenda ñin cháa tá'an tachí káni, te ni ketá'an-ni-de jíin-yá. <sup>3</sup>Te ncháá-de ma'ñú vé'e añu. Te tú ni ñin kúndéé kú'ni-de jíin cadena. <sup>4</sup>Chí kua'a xa'an jíinu ni nu'ni-de jíin manea jíin cadena. Ko cadena-ún, ndí'i-ni ni ja'nu sava-de. Te manea-ún, ndí'i-ni ni kukuáchí ní sá'a-de. Te tú ni ñin kúndéé jíin-de ka'nu-de. <sup>5</sup>Te taká kivi ndúu ñúu-ni jíika-de yuku jíin má'ñú vé'e añu. Te kána jíin-de, te stují-dé máá-de jíin yúu. <sup>6</sup>Te ni jini-de ja á jíká-ga vai Jesús. Te ni chaa-de corre kua'an-de nuu-yá. Te ni jukuini jíití-de nuu-yá. <sup>7</sup>Te ni kana kó'ó-de: Naún sá'a-ní jíin-ná Jesús, Se'e Dios, I'a kúñá'nu xa'an. Ká'an ndá'ú-ná jíin-ní onde jíin Dios, ma xndó'o-ní náá, áchí-de. <sup>8</sup>Chí ni ka'an-ya: Tachí káni, kenda ki'in-ro iní cháa yá'a, áchí-ya. <sup>9</sup>Te ni jika tu'un-yá-de: Naún nání-ró. Te máá-de, ni ka'an-de: Chaa kua'a xa'an nání-ná,

chí kua'a-ná ío, áchí-de. <sup>10</sup>Te ni ka'an ndá'ú-de jíin-yá ja má kíin'in-ya-dé ñuu-ún ki'in-de. <sup>11</sup>Te yani yuku yúan ío ñin tikuní ká'nu kiní kájitu-tí. <sup>12</sup>Te tachí káni-ún, ni kaka'an ndá'ú jíin-yá: Tájí-ní náá ná kíngoyo-ná kivi-ná iní kiní yúan, áchí. <sup>13</sup>Te Jesús, ni ja'a-ya tú'un. Te ni kenda tachí káni-ún kája'an. Te ni kivi koyo iní kiní. Te tikuní kiní-ún, ni kajungoyo-tí ñin yukáva onde iní mar. Te kiní-ún ío nátu'un uu mil-tí. Te nuu mar ni kajití-tí. <sup>14</sup>Te cháa kándito-tí yúan, ni kajinu-de. Te ni kakastu'un-de nuu ñuu jíin núu rancho. Te ni chakoyo ñayivi-ún kánde'e-i naún ní kuu. <sup>15</sup>Te ni chakoyo-i nuu Jesús. Te ni kajini-i nuu cháa ni ndo'o jíin tachí káni-ún. Te kánchaa-de, ñú'un-de sa'ma, te a ni nduva'a xini-dé. Te ni kayu'ú-i. <sup>16</sup>Te cháa ni kajini-ún, ni kakastu'un-de nuu ñayivi vái koyo ndasa ni ta'an cháa ni yí'i tachí káni-ún, te ndasa ni kuu jíin kiní-ún. <sup>17</sup>Te ni kakejá'a-de ni kaka'an-de jíin-yá ja ná kenda-ya ñuu-de ki'in-ya. <sup>18</sup>Te ni kivi-ya iní barco. Te cháa ni ta'an tachí káni-ún ká'an ndá'ú-de jíin-yá, ja kúndee-de jíin-yá kuní-de. <sup>19</sup>Ko Jesús, tú ní ja'a-ya tú'un, chí ni ka'an-ya jíin-de: Kuáno'on vé'e-ró núu tá'an-ró. Te kani-ró tú'un ná ñá'nu xa'an tínu ni sá'a máá Jíto'o-ro jíin-ró, te ndasa ni kundá'ú iní-ya róo, áchí-ya. <sup>20</sup>Te ni kee-de kua'an-de. Te ni kejá'a-de ni jacha-de tu'un iní nuu Decápolis ná ñá'nu xa'an tínu ni sá'a Jesús jíin-de. Te ndivii ñayivi yúan, ni kanaa iní-i kájini tu'un-i.

#### Tu'un sesíí Jairo

<sup>21</sup>Te ni ja'a tuku Jesús kua'an-ya jíin barco ingá lado. Te



n̄i k̄andutútú kuá'a xáan n̄áyivi núu-yá. Te máá-yá, kándii-ya yú'u mar. <sup>22</sup>Te n̄i chaá iin chaá nání-de Jairo kúná'nu-de in̄i ve'e sinagoga. Te n̄i jini-de nuu-yá. Te n̄i jukuiñi jítí-de nuu-yá. <sup>23</sup>Te n̄i ka'an ndá'ú téyíí-de jíin-yá: Sesí'í-ná a yani kuu-i. Ki'in-yo te xndée-ní nda'a-ní sikí-í náva'a ná káku-i, te nachaku-i, áchí-de. <sup>24</sup>Te n̄i kee-ya kuá'an-ya jíin-de. Te n̄i kandikin kua'a n̄áyivi kája'an-i jíin-yá. Te n̄i kajaxin-i-ya.

**Já ní nasáva'a-ya iin  
ñá'an kú'u kue'e niñi**

<sup>25</sup>Te yúan ío iin ñá'an ní kuu uxí uu kuaí ndó'o-ña kué'e játi niñi-ñá. <sup>26</sup>Te xaan ní ndo'o-ña jíin ñátaná. Te n̄i janu-ña táká ja ñáva'a-ña jíin. Te tú kuti ní kúu tana, chí sasua ví'í-gá n̄i sá'a. <sup>27</sup>Te n̄i jini tu'un-ña tú'un Jesús. Te n̄i jaá-ña íchi yatá-yá ma'ñú n̄áyivi kuá'a-ún. Te n̄i ké'é-ña sá'ma-yá. <sup>28</sup>Chi n̄i ka'an-ña: Nú ná ké'é-rí vasté sá'ma-yá, te káku-ri. Achí-ña. <sup>29</sup>Te onde nuu kána niñi-ñá-ún, n̄i ichi-ni. Te n̄i jini-ña já onde in̄i yiki kúñu-ña ní nduva'a tundó'o tá'an-ña-ún. <sup>30</sup>Te Jesús, n̄i jini-ni in̄i máá-yá ja ní kenda fuerza-ya kuá'an. Te n̄i jíó káva-ya núu n̄áyivi kuá'a. Te n̄i ka'an-ya: Ndéja ní ké'é sá'ma-rí, áchí-ya. <sup>31</sup>Te chaá káskuá'a jíin-yá, n̄i kaka'an-de: Ndé'é-ní ja n̄áyivi kuá'a yá'a kájaxin-i níí, te áchí-ní: Ndéja ní ké'é rúu, áchí-de. <sup>32</sup>Te máá-yá, yá'a yúan ndé'é-yá náva'a kuni-ya ndéja ní sá'a. <sup>33</sup>Yúan-na te ñá'an-ún, yú'ú-ña te kisi-i-ña, chí a jiní-ña ndasa n̄i ta'an-ña. Te n̄i chaá-ña. Te n̄i jukuiñi jítí-ña núu-yá. Te n̄i kachi ndaa-ña táká tu'un. <sup>34</sup>Te

máá-yá, n̄i ka'an-ya jíin-ña: Hija, n̄i kandíja-ró te yúan ní káku-ró. Ma yú'ú-ro, chí n̄i nduva'a-ró tundó'o tá'an-ro, áchí-ya.

**Já ní nachaku sesí'í Jairo**

<sup>35</sup>Te sá súan ká'an-ya, te n̄i chakoyo n̄áyivi ká'lin ve'e chaá kúná'nu in̄i ve'e sinagoga, te n̄i kaka'an-i jíin-de: A n̄i jíí'í sesí'í-ní. Naja stá'an-ga-ní Maestro, áchí-i. <sup>36</sup>Te Jesús, n̄i jini so'o-ya tú'un yá'a ja súan n̄i kaka'an-i jíin cháa kúná'nu in̄i ve'e sinagoga. Te n̄i ka'an-ya jíin-de: Ma yú'ú-ro. Kandíja te n̄i kuu-ni, áchí-ya. <sup>37</sup>Te tú ní já'a-ya tú'un kundikin ni iin yata-yá, chí máá-ni Pedro jíin Jacobo jíin ñaní-de Juan. <sup>38</sup>Te n̄i chakoyo-ya vé'e chaá kúná'nu in̄i ve'e sinagoga. Te n̄i jini-ya já kúvaa, kánde'e, kákana jík'ó'ó xáan kákuu. <sup>39</sup>Te n̄i kivi-ya. Te n̄i ka'an-ya: Naja kákuvaa-ro kánde'e-ro. Te suchí sí'í yá'a, tú ní jí'í-i, chí kixí-ni-i, áchí-ya. <sup>40</sup>Te n̄i kasákátá n̄áyivi-ún nuu-yá. Ko máá-yá, n̄i kiñi'in ndí'í-ya-í kája'an-i yata ké'e. Te n̄i ki'in-ya máá-ni táa náa suchí sí'í-ún, jíin cháa ká'lin jíin-yá, te n̄i kivi-ya núu kátuu suchí sí'í-ún kua'an-ya. <sup>41</sup>Te n̄i tiin-ya ndá'a suchí sí'í-ún. Te n̄i ka'an-ya jíin-i: Talita cumi, ja kuni ka'an: Súchi, jíin-ró ká'an-ri, ndukoo, áchí-ya. <sup>42</sup>Te n̄i ndukoo-ni suchí sí'í-ún. Te n̄i jika-i, chí a ío-i uxí uu kuaí. Te n̄i kánaa iní-de kánde'e-de, te xaan káyu'ú-de. <sup>43</sup>Te Jesús, n̄i ka'an xaan-yá jíin-de ja tú ni iin kuni tu'un. Te n̄i ka'an-ya jíin-de ja ná kuá'a-de ja kéé-í.

**Já ní kaské'ichi-i-ya núu Nazaret**

**6** Te n̄i kenda-ya yúan. Te n̄i najaa-ya núu-ya. Te chaá

káskuá'a jíin-yá, ni kandik̄in-de-ya kája'an-de. <sup>2</sup>Te máá kivi ndéatú ni stá'an-ya tú'un iní ve'e sinagoga. Te kua'a ñáyivi, ni kanaa iní-i kájini ná'ín-i. Te káka'an-i: Ndé ni ni'in cháa yá'a tu'un yá'a. Te naún kuní ka'an tu'un ndíchí ní ni'in-dé-ún. Te naún siki kúu tiñu ñá'nu ja sá'a-de jíin ndá'a-dé-ún. <sup>3</sup>Nasú yá'a kúu cháa tújí yúnu. Te nasú sé'e María, ñani Jacobo jíin José jíin Judas jíin Simón kúu-de náún. Á tú ká'jin kua'a-de jíin-yó yá'a, áchí-i. Te súan ni kakujá'a iní-i jíin-yá. <sup>4</sup>Te Jesús, ni ka'an-ya jíin-i: Chaa jáni tu'un Dios, máni nuu-de jíin tá'an-de jíin iní ve'e-de kúu ja tú káka'an tu'un jíin'ún jíin-de, áchí-ya. <sup>5</sup>Te tú ní kúu sá'a-ya ní ñin tiñu ñá'nu yúan. Chi yakú-ni ñayivi kaku'u ni nasáva'a-ya, já ní xndée-ya ndá'a-yá siki-í. <sup>6</sup>Te náa iní-ya ndé'é-ya ja tú kákandíja máá-i. Te ni jíkó núu-ya níí nuu yani. Te ni stá'an-ya tú'un.

#### **Ja ní tájí-yá ndí'uxí uu-de kája'an-de**

<sup>7</sup>Te ni kana-ya xiní uxí uu cháa káskuá'a jíin-yá. Te tájí-yá ndí'úu ndí'úu-de k̄ingoyo-de. Te ni ja'a-ya fuerza iní-de ja kúndéé-de jíin tachí k̄ini. <sup>8</sup>Te ni tá'ú-yá tiñu nuu-dé ja tú kuti naún kúndiso-de kuu-de ichi. Ni ñunu, ni statilá, ni xu'ún kúnu'ni sánchji-de. Chi máá vara-ni kundá'a-de. <sup>9</sup>Ko ki'vi-de ndijan. Te tú ku'un-de uu su'nu, áchí-ya. <sup>10</sup>Te suni ni ka'an-ya jíin-de: Nani ve'e kúu nú ni k̄ivi-ró, te kendoo-ró iní ve'e-ún onde nú ni kenda-ró yúan kua'an-ro. <sup>11</sup>Te taká nuu tú kájatá'ú róo yúan, ni tú káchu'un iní tu'un ká'an-ro, onde nú ni kenda-ró yúan te skóyo-ró t̄kacha iní ja'a-ro, te

súan kani ndaa-ro tú'un nuu-í. Jandáa ká'an-ri jíin-ró ja vítá-ga koo kuachi siki nuu Sodoma jíin nuu Gomorra kivi k̄i juicio, vásá siki nuu-ún, áchí-ya. <sup>12</sup>Te ni kenda koyo-de. Te ni kajani-de tu'un ja taká ñayivi ná nákaní iní-i. <sup>13</sup>Te suni kua'a tachí k̄ini ni kakiñi'in-de kája'an. Te jíin aceite ni kachi'i-de ñayivi kaku'u, te ni kanasáva'a-de-i.

#### **Ja ní j'i Juan, cháa skuánducha**

<sup>14</sup>Te rey Herodes, ni jini tu'un-de tu'un Jesús, chi sí'vi-yá ni jicha nuu ndijin kua'an. Te ni ka'an-de: Jan jaan, Juan ja ní skuánducha-ún, ni nachaku ma'ñú ndíyi. Ja yúan sátiñu tiñu ñá'nu xaan iní núsáa, áchí-de. <sup>15</sup>Ko sava-i ni kaka'an-i: Elías kúu-de. Te sava-ga-i ni kaka'an tuku-i: ñin cháa jáni tu'un Dios kúu-de, nátu'un cháa ni kajani tu'un-ya onde sáa, áchí-i. <sup>16</sup>Te ni jini tu'un Herodes. Te ni ka'an-de: Yúan kúu Juan ja ní janchaa-ri xiní, te ni nachaku núsáa, áchí-de. <sup>17</sup>Chi suni máá Herodes, a ni tájí-de cháa ni jat̄in Juan. Te ni ju'ni-de cháa. Te ni chindee-de cháa vekaa ja kuáchi Herodías, ñasí' Felipe ñani máá Herodes. Chi ni janchaa-de-ña kúu tuku-ña ñasí'f-de. <sup>18</sup>Te Juan, a ni kana jíin-de nuu Herodes: Tú ío ley kuaka-ró ñasí'f ñani-ro, áchí-de. <sup>19</sup>Ko ña'an, Herodías-ún, ni jito yu'u-ña Juan, chi ka'ni-ña-de kuní-ña núú. Ko tú ní kúu sá'a-ña. <sup>20</sup>Chi Herodes, ni yu'ú-de ni jito-de Juan, chi jiní Herodes ja cháa ndaa cháa ndoo kúu Juan. Te ni ndito va'a-de cháa. Te jini ná'ín-de ja ká'an Juan, te náa iní-de ndé'é-de. Te ni io iní ni io añú-de ni jini ná'ín-de

tʉ'un ká'an Juan. <sup>21</sup>Te iin kivi ní kusii iní Herodes. Te nī sá'a-de iin viko kivi ní kaku-de. Te nī sá'a-de iin ja kúxini cháa kákuñá'nu jíin-de, jíin cháa kákuu general, jíin cháa kákuñá'nu ñuu Galilea. <sup>22</sup>Te nī kivi sesí'í máa Herodías jíta já'a-i. Te Herodes jíin táká cháa káyee staa jíin-de, nī kakusii iní-de nī sá'a-i. Te rey-ún, nī ka'an-de jíin súchí sí'í-ún: Kakan naún kuní-ro núu-rí te ná kuá'a-ri nuu-ro, áchí-de. <sup>23</sup>Te nī jatʉ'un téyíí-de: Taká naún kuní-ro kakán-ro núu-rí te ná kuá'a-ri nuu-ro, vasa onde sava ñuu ja tʉin-ri, áchí-de. <sup>24</sup>Te nī kenda-i kua'an-i. Te nī ka'an-i jíin náa-i: Naún kakán-ná nuu-dé, áchí-i. Te nī ka'an-ña jíin-i: Xini Juan ja skuánducha-ún kakan-ro, áchí-ña. <sup>25</sup>Yúan-na te máa-i, nī ndivi-ni-i nuu rey. Te nī jikan-i: Vina ncha te kuní-ná kuá'a-ní xini Juan ja skuánducha-ún nuu-ná kundee nuu iin ko'o, áchí-i jíin-de. <sup>26</sup>Te rey-ún, nī kuxíí xáan iní-de. Ko sikí já ní jatʉ'un téyíí-de, jíin sikí já ní kajini so'o cháa káyee staa jíin-de, te tú ní kuní-de sásá'an-de kuá'a-de nuu-í. <sup>27</sup>Te rey-ún, nī tájí-ni-de iin soldado ndíto yuxé'é-ún kua'an kuakí'in xini Juan. <sup>28</sup>Te soldado-ún, nī ja'an. Te nī janchaa xini Juan iní vekaa. Te nī chaa jíin xini-ún kánde nuu iin ko'o. Te nī ja'a nuu súchí sí'í-ún. Te suchí-ún, nī ja'a-i nuu náa-i. <sup>29</sup>Te nī kajini tʉ'un cháa káskuá'a jíin Juan. Te nī jakoyo-de, nī kandaña-de yiki kúñu-ún. Te nī kachindee-de iní ve'e añú.

**Ja ní kandutútú cháa apóstol nuu-yá**

<sup>30</sup>Te cháa apóstol, nī kandutútú-de nuu Jesús. Te nī

kanakani-de tʉ'un taká tiñu nī kasá'a-de, jíin tʉ'un nī kastá'an-de. <sup>31</sup>Te máa-yá, nī ka'an-ya jíin-de: Ña'an sáin iin lugar ñu'un té'é, te ndetatú-ro iin tí'lí, áchí-ya. Chī kua'an vai kua'a ñáyivi kákuu-i. Te ni tú ní kánuña-ya já kée-yá staa. <sup>32</sup>Te kája'an-ya iní iin barco onde nuu ío sáin ñu'un té'é. <sup>33</sup>Te nī kajini ñáyivi já kája'an-ya. Te nī kanakuni-i-ya. Te onde taká ñuu nī kajinu-i nī kakutútú-i yúan. Te nī jakoyo-i xna'an-ga vasa máa-yá. Te nī kakutútú-i nuu-yá. <sup>34</sup>Te nī kenda Jesús. Te nī jini-ya ñáyivi kuá'a xáan-ún. Te nī kundá'ú iní-ya-í, chī nátʉ'un rií tú jito'o súan ká'iin-i. Te nī stá'an-ya kuá'a tʉ'un nuu-í.

**Ja ní skée-yá u'un mil ñáyivi**

<sup>35</sup>Te sáa chī a kuá'ini, te cháa káskuá'a jíin-yá, nī jaa-de nuu-yá. Te nī kaka'an-de: Yá'a chī máa ñú'un té'é kúu, te a kuá'ini. <sup>36</sup>Núsáá te tájí-ní-i ná kóngoyo-i taká rancho jíin táká ñuu yani yá'a, te ná kuáan máa-i staa kée-í, chī tú naún kée-í, áchí-de. <sup>37</sup>Te máa-yá, nī ka'an-ya: Kuá'a máa-ró já kée-í, áchí-ya jíin-de. Te nī kaka'an-de jíin-yá: Kíngoyo-ná te kuaan-ná uu ciento peso staa te kuá'a-ná kee-í náún, áchí-de. <sup>38</sup>Te nī ka'an-ya jíin-de: Nasaa staa kándiso-ró. Kuánde'é, áchí-ya. Te nuu ní kajini-de, te nī kaka'an-de: U'un statilá te uu tiyáká ío, áchí-de. <sup>39</sup>Yúan-na te nī tá'ú-yá tiñu nuu ñáyivi-ún ja ná júngoo sáin iin nuu iin nuu-í sikí ichá kuí. <sup>40</sup>Te nī kajungoo yukun-i, iin ciento, iin ciento-i, jíin uu xiko uxí, uu xiko uxí-i. <sup>41</sup>Te nī ki'in-ya ndí'ú'un statilá-ún jíin uu tiyáká-ún.

Te ni ndakoto-ya íchi ándívi. Te ni jikan ta'u-yá ja'a státilá. Te ni sákuáchí-yá státilá-ún. Te ni ja'a-ya núu cháa káskuá'a jíin-yá ni kajani-de nuu-í. Te ni saka-yá ndí'úu tiyáká-ún nuu táká-i. <sup>42</sup>Te ndivii ñáyivi-ún, ni kayee-í. Te ni kanda'a chíi-i. <sup>43</sup>Te ni kanastútú-de ja ní kendoo kuáchí, onde uxi uu jika chítú ndíi kúu, onde jíin tiyáká. <sup>44</sup>Te cháa ni kayee-ún jíinu onde u'un mil-de.

### Ja ní jika já'a-yá nuu mar

<sup>45</sup>Yúan-na te ni skandá-ni Jesús cháa káskuá'a jíin-yá, ni kivi koyo-de iní barco. Te ná kúxnúu-de nuu-yá kingoyo-de inga lado yu'u mar nuu núu Betsaida. Chí kuéé jachá-ya ñáyivi kuá'a-ún. <sup>46</sup>Te ni nakuatá'ú-yá nuu ñáyivi-ún kuangoyo-i. Te ni kee-ya kuá'an-ya onde yuku kuákakan ta'u-yá. <sup>47</sup>Te ni ini, te barco-ún a kándeé onde ma'nú mar. Te máá íin-nā-ya ní ndoo-ya núu nú'íchi. <sup>48</sup>Te ni jini-ya já ní kakuítá-de káskáka-de barco-ún, chí sua ni nana nuu tachi. Te tíkuáan-nā kúu, te ni cháa-ya núu-dé jíika já'a-yá nuu mar. Te a ja'a-ya núu-dé ki'in-ya núu. <sup>49</sup>Te ni kajini-de-ya já jíika-ya núu mar. Te ni kajani iní-de ja añú kúu. Te ni kákana kó'ó-de. <sup>50</sup>Chí ndí'i-de, ni kajini-de nuu-yá. Te ni kayu'ú-de. Yúan-na te ni ka'an-ni-ya jíin-de: Ndéé sá'a-ró iní-ro. Máá-rí kúu. Ma yú'ú-ro, áchí-ya. <sup>51</sup>Te ni kaa-ya ní kivi-ya jíin-de iní barco-ún. Te ni jukuiñi tachi. Te máá-de, ni kanaa xáan iní-de kánde'é-de nuu-yá. <sup>52</sup>Chí ní tú ní kájuku'un iní-de ja ní kuu jíin státilá-ún, chí ndava iní añú-de.

### Ñáyivi káku'u nuu Genesaret

<sup>53</sup>Te ni kaja'a-ya vái-ya ingá lado. Te ni chakoyo-ya nú'íchi núu Genesaret. Te yundúcha-ún ni kajukuñi-ya. <sup>54</sup>Te nuu ní kenda koyo-ya iní barco, te ñáyivi yúan, ni kanakuni-ni-i Jesús. <sup>55</sup>Te ni kajicha nuu-i taká ndañúu yúan. Te ni kakejá'a-i ni káskuíndíso-i ñáyivi káku'u jíin jíto yuu, onde nuu ní kajini tu'un-i kándeé-ya. <sup>56</sup>Te ndéni ni kuu nú ni kivi-ya, á nuu lúli, á nuu ká'nu, á rancho, te kájani-i ñáyivi káku'u-ún iní ichi. Te káka'an nda'ú-i jíin-yá vasté yúsá'ma-yá ná ké'é-i. Te taká ñáyivi ní kak'éé sá'ma-yá-ún, ni kanduva'a-i.

### Siki ndása kuchá'an ñáyivi

**7** Te cháa fariseo jíin yakú cháa káchaa tutu, ni kikoyo-de ichi núu Jerusalén. Te ni kakutútú-de nuu Jesús. <sup>2</sup>Te cháa-ún, ni kajini-de ja sáva cháa káskuá'a jíin-yá káyee-dé staa jíin ndá'a chá'an-de, kuachi ja tú ní kanandá'a-de. Te ni kándonda siki-dé. <sup>3</sup>(Chí cháa fariseo jíin táká cháa judío, nú tú nandá'a ná'an-de, tú káyee-dé staa. Chí káñava'a-de taninu aná'an. <sup>4</sup>Te nú ni kanajió káva-de ja ní kaja'an-de nuyá'u, te nú tú nasándoo-de máá-de, tú káyee-dé. Te ío kua'a-gá taninu káñava'a-de te káchiñú'ún-de, nátu'un ndúndoo vaso, tindo'o, ko'o káa, jíin jíto.) <sup>5</sup>te cháa fariseo jíin cháa káchaa tutu, ni kajika tu'ún-de-ya. Te cháa káskuá'a jíin-ró, naja tú káchiñú'ún-de taninu cháa aná'an. Naja káyee-dé staa jíin

ndá'a chá'an-de, áchí-de. <sup>6</sup>Te ni ka'an-ya jíin-de: Chaa uu xini kákuu-ró. Bueno ni jani Isaiás tu'un sikí-ro, chí súan ni chaa máa-de tu'un sáa: Ñayivi yá'a jíin yú'u-í káchiñ'ún-i ruu, ko jíin añú-i chí jíká-ni kákuu iní-i jíto-i ruu. <sup>7</sup>Te káchiñ'ún sáni-i ruu, chí kástá'an-i tu'un jáni iní iin chaa, áchí Isaiás. <sup>8</sup>Chi ni kasía-ro tíñu ni tá'ú Dios nuu-ro, te káchiñ'ún-ró táninu ni kajakin chaa, ja ndúndoo tind'o jíin vaso. Te kánava'a-ró kuá'a-gá taninu súan, áchí-ya. <sup>9</sup>Te suni ni ka'an-ya: Bueno-ni kástívi-ró tú'un tá'ú tíñu Dios náva'a chiñ'ún-ró táninu ni kajakin máa-ró. <sup>10</sup>Chi Moisés, ni ka'an-de: Kuandatu-ro núu táa-ro núu náa-ro. Chí nú ndéja ká'an ndíva'a jíin táa jíin náa, ná kúu nú kuu. Achí-de. <sup>11</sup>Ko máa-ró káka'an-ro: Nú ío ndatíñu ja xíin iin chaa. Te a kuu ni'in tíñu ja kuní táa-de xí náa-de, ko nú xna'an-ga ka'an-de ja Corbán kúu (ja kuní ka'an, a ni soko-rí nuu Dios), <sup>12</sup>yúan-na te tuká jínu ñú'ún kúti sá'a-de ja kuní táa-de xí ja kuní náa-de, áchí-ro. <sup>13</sup>Te súan kástívi-ró tú'un Dios jíin táninu ni kajakin-ro. Te kua'a-gá tíñu súan kásá'a-ró, áchí-ya. <sup>14</sup>Te ni kana tuku-ya xini ñáyivi kuá'a-ún. Te ni ka'an-ya jíin-i: Ndí'i-ró ná kúni so'o-ró tú'un ká'an-ri, te chu'un iní-ro. <sup>15</sup>Taká ndatíñu ío ichi fuera chaa, nú ni kivi iní yu'u-dé, ma kúchá'an-de sá'a. Chi ja kenda iní yu'u-dé, yúan kúu ja kúchá'an-de sá'a. <sup>16</sup>Chaa ío so'o kuni ná'ín, te ná kúni so'o-de, áchí-ya. <sup>17</sup>Te nuu ní kusíin-ya núu ñáyivi kuá'a-ún, te ni ndívi-ya iní ve'e. Te chaa káskuá'a jíin-yá,

ni kajika tu'un-de-ya sikí tú'un yátá-ún. <sup>18</sup>Te ni ka'an-ya jíin-de: Suni tú kájuku'un iní máa-ró náún. Á tú kájini-ro ja táka ja kivi iní chaa, ma kúu kuchá'an-de sá'a, <sup>19</sup>chí tú kivi iní añú-de, chí toko-dé kivi, te ndenda-ni kua'an, áchí-ya. Súan ni stá'an-ya ja ío ndoo taká ndeyu. <sup>20</sup>Te ni ka'an-ga-ya: Ja kenda ichi iní ñayivi, yúan kúu ja kúchá'an-i sá'a. <sup>21</sup>Chí onde ichi iní añú kenda ja jáni ñáa iní, ja ísiki ncháa tá'an, ja kuaxán iní, ja jáni ndíyi, <sup>22</sup>ja sakuí'ná, ja too iní, ja ñáa, ja xndá'ú ñá'an, ja tuká kúka nuu, ja ndákoto xaan, ja ká'an sikí tá'an, ja sávixi máa, ja xini ñáa. <sup>23</sup>Taká tu'un ñáa yá'a, máni ichi iní añú kenda te kúchá'an-i sá'a, áchí-ya. <sup>24</sup>Te ni ndukuíni-ya yúan. Te kua'an-ya onde raya nuu Tiro jíin ñuu Sidón. Te ni kivi-ya iin ve'e. Te kuni-ya ja tú ni iin kuni tu'un. Ko tú ní kúu kundee sá'i-ya yúan.

### Ña'an sirofenicia

<sup>25</sup>Chí iin ña'an ío iin sesí'i-ña tá'an-i tachí káni. Te ni jini tu'un-ña tú'un-ya. Te ni chaa-ni-ña. Te ni jukuíni jíti-ña núu-yá. <sup>26</sup>Te ña'an-ún, ña'an griega kúu-ña. Te onde nuu Sirofenicia vai tata-ña. Te ni ka'an nda'ú-ña jíin-yá ja ná kíni'in-ya tachí káni tá'an sesí'i-ña-ún kí'in. <sup>27</sup>Te Jesús, ni ka'an-ya jíin-ña: Sía, ná ndá'a xna'an-ga chíi taká suchí yá'a, chí tú ío va'a ja kuánchaa-yo stáa-í te skána-yó núu lúsu, áchí-ya. <sup>28</sup>Te ni ka'an-ña: Jandaa ká'an-ní Táta, ko lúsu-ún ichi chíi mesa náchii-tí staa kuachí kóyo yu'u-í yáji-tí, áchí-ña. <sup>29</sup>Yúan-na te ni ka'an-ya jíin-ña: Kuá'an núsáa, chí

tɔ'un va'a kúu ja ní ka'an-ro yá'a. Te tachí kíni-ún, a nì kenda kua'an inì sēsí'f-ro, áchí-ya. <sup>30</sup>Te nì kee-ña kuáno'on-ña ve'e-ña. Te nì jini-ña ja kátúu sēsí'f-ña núu jíto. Te a nì kenda tachí kíni-ún kua'an.

### Chaa só'ó kásteté

<sup>31</sup>Te nì kenda tuku-ya ondé raya ñuu Tiro, nì kii-ya íchi Sidón. Te nì jaq-ya mar Galilea. Te nì ja'ncha sava-ya raya ñuu Decápolis vai-ya. <sup>32</sup>Te nì kákinchaka-i ñin chaa só'ó kásteté núu-yá. Te nì kaka'an nda'ú-i jíin-yá ja ná xndée-ya ndá'a-yá siki-dé. <sup>33</sup>Te nì kiñi'in siin-ya-dé nuu ñáyivi kuá'a-ún. Te nì chindee-ya ndá'a-yá so'o-de. Te nì tiví si'ví-yá. Te nì kélé-yá yáa-dé. <sup>34</sup>Te nì ndakoto-ya íchi ándíví. Te nì jaka nuu inì-ya. Te nì ka'an-ya jíin-de: Efata, áchí-ya. Ja kuní ka'an: Nanuña. <sup>35</sup>Te nì nanuña so'o-de. Te nì nduvítá yáa-dé. Te nì kuu-ni nì naka'an káji-de. <sup>36</sup>Te nì ka'an xa'an-yá jíin ñáyivi-ún ja tú ni ñin nuu kachí-i. Te vasa ñi'in nì ka'an xa'an-yá jíin-i, ko ví'í-gá nì kajacha-i tu'un-ya. <sup>37</sup>Te nì kanaa xa'an iní-i kándé'é-i. Te nì kaka'an-i: Bueno sá'a-ya táká tiñu; chi chaa só'ó nákuini so'o-de, te chaa ñí'ín náka'an-de sá'a-ya, áchí-i.

### Ja ní skée-yá kuun mil ñáyivi

**8** Te kivi-ún, nì io kua'a xa'an ñáyivi, te tú ñaún káji-í. Te nì kana Jesús xinì cháa káskuá'a jíin-yá. Te nì ka'an-ya jíin-de: <sup>2</sup>Kúndá'ú inì-ri ñáyivi kuá'a yá'a, chi a nì kuu unì kivi káxiukú-i jíin-rí, te tú ñaún káji-í. <sup>3</sup>Te nú natáji-rí-i no'on ndicha-i ve'e-i, te sava ichi

te kuítá ii-í, chí ío sava-i jíká vái koyo-i, áchí-ya. <sup>4</sup>Te chaa káskuá'a jíin-yá, nì kaka'an-de jíin-yá: Te ndéchi kíi staa kée ndá'a chíi ñáyivi yá'a, chí máni ñu'un té'é kúu yá'a. Achí-de. <sup>5</sup>Te nì jiká tu'ún-yá-de: Nasaa staa kándiso-ró. Achí-ya. Te nì kaka'an-de: Usia-ni statilá, áchí-de. <sup>6</sup>Yúan-na te nì tá'ú-yá tiñu nuu ñáyivi kuá'a-ún ja ná júngoo-i nuu ñu'un. Te nì ki'in-ya ndí'usiá statilá-ún. Te nì jikan ta'u-yá. Te nì sákuáchí-yá. Te nì ja'a-ya núu cháa káskuá'a jíin-yá, ja ná káni-de nuu ñáyivi kuá'a-ún. Te nì kajani-de nuu-í. <sup>7</sup>Te suni kándiso-de yaku tiyáká lúli. Te nì jikan ta'u-yá ja'a-tí. Te nì tá'ú-yá tiñu ja súni ná káni-de nuu-í. <sup>8</sup>Te nì kayee-í. Te nì kanda'a chíi-i. Te nì kendo-ga. Te nì kanastútú-de usia ndo'o já ní kendo kuáchí. <sup>9</sup>Te ñáyivi ní kayee-ún ío nátu'un kuun mil-i. Te nì jacha-ya-í kua'an-i. <sup>10</sup>Yúan-na te nì kivi-ni-ya iní barco jíin cháa káskuá'a jíin-yá. Te nì chaa-ya ndáñúu Dalmanuta.

### Tu'un yujan ía cháa fariseo

<sup>11</sup>Te yúan nì chakoyo chaa fariseo. Te nì kakejá'a-de káxndichí-de-ya kájikán-de tuni ichi ándíví núu-yá chí koto ncha-de-ya kákuini-de. <sup>12</sup>Te nì jaka nuu inì-ya. Te nì ka'an-ya: Naja kájikán ñáyivi yá'a tuni nuu-rí. Jandáa ká'an-ri jíin-ró ma kuá'a-ri ni ñin tuni nuu ñáyivi yá'a. <sup>13</sup>Te nì skéndo-ya-dé jíná'an-de. Te nì ndívi tuku-ya iní barco, te kua'an-ya ingá lado. <sup>14</sup>Te chaa káskuá'a jíin-yá, nì kanaa iní-de kundiso-de staa. Chí ñin-ni statilá kándiso-de iní barco. <sup>15</sup>Te nì

ka'an xaan-yá jíin-de: Koto va'a-ró máá-ró núu yújan ía cháa fariseo jíin núu yújan ía Herodes, áchí-ya. <sup>16</sup>Te kándatü'ún máá-de: Sikí já tú kándiso-yó stáa núsáa, áchí-de. <sup>17</sup>Te ni jini Jesús. Te ni ka'an-ya jíin-de: Naja kándatü'ún-ró. Ja tú kándiso-ró stáa náún. Á tú kájini-ro. Á cha'an-ga juku'un iní-ro. Sáni ndava iní añú-ro náún. <sup>18</sup>Ká'io so'o-ró, te á tú kájini so'o-ró. Ká'io nduchi-ro, te á tú kánde'é-ró, te á tú kánuku'un iní-ro. <sup>19</sup>Te nasaa jika chítú ndíi státilá ni kendoo kuáchí ní kanastútú-ró kivi ní sakuáchí-rí u'un státilá ni kayee ú'un mil chaá, áchí-ya. Te ni kaka'an-de: Uxi uu-ni, áchí-de. <sup>20</sup>Te ni ka'an tuku-ya: Te nasaa ndo'o chítú ndíi státilá ni kendoo kuáchí ní kanastútú-ró kivi ní sakuáchí-rí usia státilá ni kayee kúun mil ñayivi, áchí-ya. Te ni kaka'an-de: Usia-ni, áchí-de. <sup>21</sup>Yúan-na te ni ka'an-ya jíin-de: Te onde vina tú kájuku'un iní-ro náún, áchí-ya.

**Ja ní nasáva'a-ya cháa kuáa núu Betsaida**

<sup>22</sup>Te ni ja-ya núu Betsaida. Te ni kákinchaka-i iin chaá kuáa núu-yá. Te ni kaka'an nda'ú-i jíin-yá ja ná ké'é-yá-de. <sup>23</sup>Yúan-na te ni tiin-ya ndá'a cháa kuáa-ún. Te ni kiñi'in-ya-dé nuu-ún. Te ni tiví si'ví-yá nduchi-dé. Te ni xndée-ya ndá'a-yá sikí-dé. Te ni jika tu'ún-yá-de: Á jini-ro yakú, áchí-ya. <sup>24</sup>Te máá-de, ni ndakoto-de. Te ni ka'an-de: Jiní-ná taká chaá. Ko nátu'un yunu jiní-ná-de kájika-de, áchí-de. <sup>25</sup>Yúan-na te ni chaá tuku-ya ndá'a-yá sikí ndúchi-dé. Te

ni ndakoto va'a-de. Te ni nduva'a ii-dé. Te onde jíká te ni jini kájí-de ndivii. <sup>26</sup>Te ni natáji-yá-de kuano'on-dé ve'e-de. Te ni ka'an-ya: Ma kivi-ró iní nuu. Te ni iin nuu cháa nuu-ún ma kachí-ro, áchí-ya.

**Tu'un ni ka'an ndaa Pedro**

<sup>27</sup>Te ni kenda Jesús jíin cháa káskuá'a jíin-yá kua'an-ya jíin-de ichi táka nuu ndañuu Cesarea de Filipino. Te ichi-ún ni jika tu'ún-yá-de: Te ruu, na chaá kúu-ri kaka'an ñayivi, áchí-ya jíin cháa káskuá'a jíin-yá. <sup>28</sup>Te ni kakastu'ún-de nuu-yá: Juan ja skuánducha, kaka'an-i. Te sava-i: Elías. Te sava-ga-i: Iin chaá ni jani tu'un Dios onde sáa, áchí-de. <sup>29</sup>Yúan-na te ni ka'an-ya jíin-de: Te róo, na chaá kúu-ri kaka'an máá-ró, áchí-ya. Te ni ka'an Pedro: Máá-ni kúu Cristo, áchí-de jíin-yá. <sup>30</sup>Te ni ka'an xaan-yá jíin-de jíná'an-de ja tú ni iin nuu kachí-de tu'un-ya.

**Jíin kivi ní ka'an-ya já kúu-ya**

<sup>31</sup>Te ni kejalá-yá ni stá'an-ya núu-dé ja jínu ñú'ún ndó'o xaan máá Sé'e chaá. Te chaá ni kayii jíin táka sutu ñá'nu jíin cháa káchaa tutu ma kuátú'ún-de-ya, chí ka'ni-dé-ya. Te nuu uní kivi te nachaku-ya, áchí-ya. <sup>32</sup>Te kájí ní ka'an-ya tú'un yá'a. Yúan-na te Pedro, ni tiin-de-ya. Te ni kejalá-de ká'an xaan-dé nuu-yá. <sup>33</sup>Te máá-yá, ni jóo káva-ya. Te ni ndakoto-ya núu cháa káskuá'a jíin-yá. Te ni ka'an xaan-yá nuu Pedro: Satanás, kuxio ki'in-ro, chí tú júku'un iní-ro tú'un Dios, chí sa tu'un chaá júku'un iní-ro, áchí-ya. <sup>34</sup>Te ni kana-ya xini

ñáyivi kuá'a-ún jíin cháa káskuá'a jíin-yá. Te nī ka'an-ya jíin-de: Nani cháa nú kunī-de kii-de yata-rí, te ma chíinú'ún-de máa-de, te ná kuandéé iní-de jíin túnd'o kii sikī-dé, te ná kúndikīn-de ruu kii-de. <sup>35</sup>Chi cháa jítú iní-de kaku-de chíi túnd'o kii sikī-dé, naa-dé. Te vasa ná kúu iin cháa ja sikī ruu jíin sikī tú'un va'a-ri, ko kaku-de. <sup>36</sup>Chi naún ní'in cháa vasa ná kúndéé-de ní'in-dé níí ñúyivi, te nú xnáa-dé añú-de. <sup>37</sup>Xí naún chúnáa cháa añú-de. <sup>38</sup>Chī nú ndé cháa kúka nuu iní-de nuu-rí jíin núu tú'un ká'an-ri ma'nú ñáyivi yá'a ja káisiiki ncháa-i Dios jíin má'nú cháa kásá'a kuachi, te suni súan kuka nuu iní máa Sé'e cháa nuu-dé, kivi ndíi-ya jíin táká ndajá'a ndóo-ya. Te kivi-ún ndúñá'nu-ya sá'a Táa-ya, áhí-ya.

**9** Te suni nī ka'an-ya jíin-de jíiná'an-de: Jandáa ká'an-ri jíin-ró: Ió sava cháa ká'in yá'a ja má kúu kuti-dé onde nú tú kunī-de ñuu nuu tá'ú Dios tiñu, ndasa kii jíin fuerza, áhí-ya.

#### Sikī já túku nī nduu-ya

<sup>2</sup>Yúan-na te nuu iñú kivi te nī jaka Jesús Pedro jíin Jacobo jíin Juan, te máni máa-ni-de nī kiñi'in sīin-ya-dé kua'an-ya jíin-de iin yuku súkún. Te yúan, tuku nī nduu-ya núu-dé. <sup>3</sup>Te sa'ma-yá nī kanandii ncháa, kiyi xaən, nátu'un yu'a volcán. Te tú ío ni iin ja súan kuu nakacha kiyi inī ñuyivi yá'a. <sup>4</sup>Te nī kandenda Elías jíin Moisés nī kajini-de. Te nī kandatú'un cháa-ún jíin Jesús. <sup>5</sup>Yúan-na te nī ka'an Pedro: Maestro, va'a-ga ná kéndoo-yó yá'a, te sá'a-ná unī ve'e

kuii. Iin kuu máa-ní, inga kuu Moisés, te inga kuu Elías, áhí-de jíin Jesús. <sup>6</sup>Chī tú ní jini-de ndasa ka'an-de, chíi káyu'ú xaən-dé. <sup>7</sup>Te nī cháa iin viko nu'ún. Te nī jasu níí núu-dé. Te nuu vikó nu'ún-ún nī kenda iin tu'un ja ní ka'an: Yá'a kúu Sé'e-ri ja kúndá'ú iní-ri, te kuni ná'in-ró tú'un ká'an-ya. Achí. <sup>8</sup>Te nī kandakoto-ni-de. Te tuká ni iin naún ní kájinī-de, chíi máa iin-na Jesús. <sup>9</sup>Te kánuu-de yuku-ún, te nī ka'an xaən-yá jíin-de ja tú ni iin nuu kachí-de ja súan nī kajini-de-ún, chíi onde ná náchaku máa Sé'e cháa ma'nú ndíyi. Achí-ya. <sup>10</sup>Te nī kañu'un inī máa-de tu'un-ún. Te kájika tu'un tá'an-de naún tu'un kúu: Ja náchaku ma'nú ndíyi. <sup>11</sup>Te nī kajika tu'un-de-ya: Te cháa káchaa tutu naja káka'an-de ja kánúu ndíi Elías xna'an-ga, áhí-de. <sup>12</sup>Te nī ka'an-ya jíin-de: Jandáa kúu ja ndíi Elías xna'an-ga, te nasájáa-de taká ndatíñu. Te suni yóso tú'un nuu tutu ja ndó'o xaən máa Sé'e cháa te sájá'a inī-i nuu-yá. <sup>13</sup>A ká'an-ri jíin-ró ja Elías, a nī kii-de. Te nī kasá'a-i taká ja ní kakuu inī-i jíin-de, nátu'un yóso tú'un-de nuu tutu, áhí-ya.

#### Suchí ñí'in

<sup>14</sup>Te nī ncha-ya núu sáva-ga cháa káskuá'a jíin-yá. Te nī jini-ya ñáyivi kuá'a xaən, nī kajikó ndúu-i níí núu-dé. Te cháa káchaa tutu kástátá'an jíin-de. <sup>15</sup>Yúan-na te taká ñayivi-ún, nī kajini-ni-i nuu-yá. Te nī kanaa iní-i kánde'é-i nuu-yá. Te nī katau-i kua'an-i nuu-yá. Te nī kaka'an-i jíin-yá. <sup>16</sup>Te nī jika tu'un-yá-i: Na sikī kástátá'an-ró



jín-de jíná'an-de, áchí-ya.  
<sup>17</sup>Yúan-na te ni ka'an iin chaá ma'nú ñáyivi kuá'a-ún: Maestro, vaí nchaka-ná se'e-ná nuu-ní, chí tá'an-i iin tachi'ñí'n. <sup>18</sup>Te tachi-ún, ndéni kúu te nú ni tiin-ni-i, te ja'ni yí'í-ni-i. Te sjáa-ni ti'ñü yu'u-í. Te skí'ñi nu'un-i. Te kuá'ichi-i sá'a. Te ni ka'an-ná jín cháa káskuá'a jín-ní ja ná kíñi'in-de kí'in. Te tú ní kákuu sá'a-de, áchí-de. <sup>19</sup>Te ni ka'an-ya jín-i: Ñáyivi xáan ní'in iní kákuu-ró. Nasaa-ga kivi kúnchaa-ri jín-ró. Te nasaa-ga kivi ndó'o-ri jín-ró. Kuá'a-i ná kí-i nuu-rí núsáa, áchí-ya. <sup>20</sup>Te ni kaja'a-de-i nuu-yá. Te ni jini-i-ya. Te tachi-ún, ni ja'ni yí'í xáan-ní-i. Te ni ndua-i nuu ñú'un. Te ni tuu-í. Te ni jaa ti'ñü yu'u-í. <sup>21</sup>Te Jesús, ni jiká tu'ún-yá táa-i: Nasaa kivi ní kuu tá'an-i tachi yá'a, áchí-ya. Te ni ka'an-de: Ondé lúli-i. <sup>22</sup>Te tondó tini jínu ni kuu chíndee-i nuu ñú'un jín núu ndúcha, ja ká'ni-í kuní. Ko nú kuu sá'a-ní, kundá'ú ini-ní náá. Te chindéé chítuu-ní náá, áchí-de. <sup>23</sup>Te ni ka'an Jesús jín-de: Te nú kándija-ró, chí chaá kándija te kuu taká ja kuní-de, áchí-ya. <sup>24</sup>Yúan-na te máá táa suchí-ún, ni ka'an jaa-ni-de: Kándija-ná, ko chindéé chítuu-ní náá chí tú kándija va'a va'a-ná, áchí-de. <sup>25</sup>Te ni jini Jesús ja ní katau ñáyivi kuá'a-ún kua'an-i nuu-yá. Te ni ka'an xa'an-yá jín tachi káni-ún: Tachi'ñí'n só'ó, ruu tá'ú-rí tiñu nuu-ro. Kenda-ró iní-i, te ma ndívi-ga-ro iní-i, áchí-ya jín. <sup>26</sup>Yúan-na te tachi-ún, ni kana kó'ó. Te tini jínu ni ja'ni yí'í xáan-gá-i. Te ni kenda kua'an. Te máá suchí-ún, ni kundíyi-ni-i. Te ni kaka'an tini

ñáyivi: A ni jil'i-i, áchí. <sup>27</sup>Te Jesús, ni tiin-ya ndá'a-í, te ni ndukani-ya-í. Te ni ndukuiñi-i. <sup>28</sup>Te nuu ní kivi Jesús iní ve'e, te chaá káskuá'a jín-yá, ni kajika tu'ún sán-de-ya: Naja tú ní kákuu kíñi'in-ná tachi-ún kí'in, áchí-de. <sup>29</sup>Te ni ka'an-ya jín-de: Iin tá'an yuán, ni ma kenda kuti kí'in, te nú tú kakan ta'u-yo te kondicha iní-yo, áchí-ya.

#### Ja ní ka'an tuku-ya já kúu-ya

<sup>30</sup>Te ni kakenda-ya yúan. Te ni kaja'a-ya kuá'an-ya íchi ndáñü Galilea. Te tú ní kuní-ya já kúni tu'un ni iin. <sup>31</sup>Te ni stá'an-ya núu cháa káskuá'a jín-yá: Ñáyivi yá'a nastúu-i máá Sé'e chaá nuu ndá'a sáva-ga chaá. Te chaá-ún, ka'ni-dé-ya. Ko nú ni jil'i-ya, te nuu uní kivi te nachaku-ya, áchí-ya jín-de. <sup>32</sup>Te máa-de, tú ní kájuku'un iní-de tu'un yá'a. Te ni kayu'ú-de kaka tu'ún-de-ya.

#### Ja ní kastátá'an-de ndé chaá kúñá'nu-ga

<sup>33</sup>Te ni jaq-ya ñü Capernaum. Te nuu ní kivi-ya iní ve'e, te ni jiká tu'ún-yá-de: Naún tu'un ni kandatú'ún-ró íchi-ún, áchí-ya. <sup>34</sup>Te máa-de, tú ní kaka'an kuti-dé. Chí ichi-ún ni kastátá'an-de ndé chaá kuu ñá'nu-ga. <sup>35</sup>Yúan-na te ni jungoo-ya. Te ni kana-ya xiní ndí'uxi uu-de. Te ni ka'an-ya jín-de: Nú ndé chaá kuní-de kunú-de, te nduu-de sandí'í-ná nuu táka tá'an-de. Te kuatíñu-de nuu tá'an-de. <sup>36</sup>Te ni tiin-ya iin suchí lúli. Te ni jani-ya-í ma'ñú-de. Te ni junu nchaa-ya-í. Te ni ka'an-ya jín-de: <sup>37</sup>Chaa ja jín sí'ví-rí

kuatá'ú-de iin suchí lúli nátu'un suchí yá'a, te ruu kuatá'ú-de. Te chaa kuatá'ú ruu, nasu ruu, chi I'a ni táji ruu vai-ri kuatá'ú-de, áchi-ya. <sup>38</sup>Te ni ka'an Juan jín-yá: Maestro, ni kajini-ná iin chaa ja jín sí'ví-ní ni kiñi'in-de tachi káni kaja'an. Te tú ndikín-de yóo. Te ni kajasu-ná nuu-dé. Chi tú ndikín-de yóo, áchi-de. <sup>39</sup>Te Jesús, ni ka'an-ya jín-de: Ma kasu-ro nuu-dé, chi iin chaa ja jín sí'ví-rí sá'a-de tiñu ñá'nu, ma kuu naka'an-de siki-rí. <sup>40</sup>Chi chaa tú ka'an siki-yo, ndújín-de jín-yó. <sup>41</sup>Te nú ndé chaa ku'a-de iin yajin ndúcha kó'o-ró jín sí'ví-rí, te nú súan ná sá'a-de chi kándujín-ró jín Cristo, jandaa ká'an-ri jín-ró ja má xnáa-dé ya'u-de.

#### Siki já skívi yóo nuu kuáchi

<sup>42</sup>Te nú iin suchí lúli yá'a kándija-i ruu te kivi-i kuáchi sá'a iin chaa, te va'a-ga nú ní nú'ni iin yosó ká'nu sukun-dé, te kenda-de ki'in-de nuu ndúcha mar núú. <sup>43</sup>Te nú nda'a-ro kuní skívi róo nuu ío kuáchi, xiti ná kí'in. Va'a-ga ja kúchaku tákú'lu-ró, nasu já kóo ndendúú nda'a-ro kí'in-ro nuu infierno, nuu kayú ñu'un ja má ndá'va kuti. <sup>44</sup>Te yúan, ni tındákú-de ma kuu-ti. Te ni ñu'un-ún ma ndá'va kuti. <sup>45</sup>Te nú ja'a-ro kuní skívi róo nuu ío kuáchi, xiti ná kí'in. Va'a-ga ja kúchaku tákú'lu-ró, nasu já kóo ndendúú ja'a-ro kí'in-ro nuu infierno, nuu kayú ñu'un ja má ndá'va kuti. <sup>46</sup>Te yúan, ni tındákú-de ma kuu-ti. Te ni ñu'un-ún ma ndá'va kuti. <sup>47</sup>Te nú nduchi-ro kuní skívi róo nuu

íó kuáchi, tava ná kí'in. Va'a-ga kivi-ró ñuu nuu tá'ú Dios tiñu jín iin-ni nduchi-ro, nasu já kóo ndendúú nduchi-ro kí'in-ro nuu infierno. <sup>48</sup>Te yúan, ni tındákú-de ma kuu-ti. Te ni ñu'un-ún ma ndá'va kuti. <sup>49</sup>Chi taká chaa kuu u'a-de sá'a ñu'un. Te taká kuñu ni soko, kuu u'a sá'a ñii. <sup>50</sup>Va'a ío ñii. Ko nú ñii-ún ná náa xikó u'a, ndasa ndu'u'a sá'a-ró núsáa. Ná kuñava'a-ró ñii iní máa-ró. Te ma kánaa-ro jín tá'an-ró, áchi-ya jín-de.

#### Siki tú'un tú xndóo tá'an

**10** Te ni kenda-ya yúan, te ni chaa-ya onde raya ñuu Judea jín ingá lado yata yúcha Jordán. Te ni kututú tuku ñayivi ku'a nuu-yá. Te ni stá'an tuku-ya tú'un nuu-í, nátu'un sá'a-ya. <sup>2</sup>Te ni jakoyo chaa fariseo nuu-yá ja kóto nchaa-de-ya. Te ni kajika tu'un-de-ya: Á ío ley ja skéndo iin chaa ñasí'i-de, xí túu, áchi-de. <sup>3</sup>Te máa-yá, ni ka'an-ya jín-de: Naún tiñu ni tá'ú Moisés nuu-ro, áchi-ya. <sup>4</sup>Yúan-na te ni kaka'an-de: Moisés, ni jatú'un-de ja kúva'a acta ndusín, te ndoo-ña, áchi-de. <sup>5</sup>Te Jesús, ni ka'an-ya jín-de: Siki já ní'in ini añu-ro jíná'an-ró, yúan súan ni tá'ú-de tiñu yá'a nuu-ro. <sup>6</sup>Ko onde xnánuú kivi ní jungoo ñuyivi, chi ja yí jín já sí'i ní sá'a Dios. <sup>7</sup>Ja yúan kuu ja skéndo chaa táa-de naa-de, te ketá'an-de jín ñasí'i-de. <sup>8</sup>Te ja ni kuu uú tá'an, iin-na kuu. Na tuká kuu uú, chi iin-na kuu. <sup>9</sup>Núsáa te ja á ni skétá'an Dios, ma ndusín kuti sá'a iin ñayivi, áchi-ya. <sup>10</sup>Te onde ve'e te chaa kásku'a jín-yá, ni kajika tu'un tuku-de-ya siki

tú'un-ún. <sup>11</sup>Te ni ka'an-ya jíin-de: Nú ndé cháa skéndoo-de ñasí'í-de te tanda'a-dé jíin ingá ña'an, te ísíki ncháa-de ñasí'í-de nú súan. <sup>12</sup>Te nú máá ñasí'í-ún xndóo-ña yíi-ñá te tanda'a-ñá jíin ingá-de, te tu'un ísíki ncháa sá'a-ña. Achí-ya.

### Jesús jíin súchí lúlí

<sup>13</sup>Te ni chakoyo sava ñayivi núu-yá jíin súchí lúlí ja ké'é-yá-i. Te cháa káskuá'a jíin-yá, ni kaka'an xaan-dé nuu ñayivi vái koyo jíin-i. <sup>14</sup>Te ni jini Jesús. Te ni kití ini-ya. Te ni ka'an-ya jíin-de: Sía, ná kíkoyo suchí lúlí núu-rí, te ma kasú-ro íchi-í, chi tá'an súan kákuu ja xíin ñuu nuu tá'ú Dios tiñu. <sup>15</sup>Jandaa ká'an-ri jíin-ró: Nú iin cháa tú játú'un-de ñuu nuu tá'ú Dios tiñu nátu'un játú'un iin suchí lúlí, ma kivi kuti-dé yúan, achí-ya. <sup>16</sup>Te ni junu nchaa-ya-í. Te ni xndée-ya ndá'a-yá xini-í jíná'an-i. Te ni jikan ta'u-yá ja'a-í.

### Chaa kúká

<sup>17</sup>Yúan-na te ni ki'in-ya íchi kuá'an-ya. Te jínu iin cháa súchí ni chaá-de. Te ni jukuiñí jítí-de nuu-yá. Te ni jiká tu'un-de-ya: Chaa va'a kúu-ní Maestro. Ndasá sá'a-ná te ni'in tá'u-ná kuchaku-ná ní káni, achí-de. <sup>18</sup>Te Jesús, ni ka'an-ya jíin-de: Naja ká'an-ro cháa va'a jíin-rí. Tú ni iin cháa va'a ío chi máá iin-ni Dios. <sup>19</sup>A jini-ro tú'un ni tá'ú tiñu-ya núu-ro: Ma kúsiki ncháa tá'an-ró, ma ká'ni-ro ndíyi, ma sakuí'ná-ró, ma ká'an-ro tú'un tú'un, ma kuánchaa-ro ndatíñu tá'an-ró; kuandatú nuu táa-ro núu náa-ro, achí-ya. <sup>20</sup>Te máa-de, ni

ka'an-de jíin-yá: Taká tiñu yá'a a ni skíkuu-ná onde ná lúlí-ná, Maestro, achí-de. <sup>21</sup>Yúan-na te ni ndakoto Jesús nuu-dé. Te ni kumani-yá jíin-de. Te ni ka'an-ya jíin-de: Iin-na tiñu kumani sá'a-ró núsáa. Kuá'an, te xikó ndí'i-ró já ñáva'a-ró, te kuá'a-ró núu ñayivi ndá'ú. Te onde andívi kóo yaji-ro. Yúan-na te kii-ró, kundikin-ro rúu ki'on, te kuandéé ini-ro jíin túndó'o kii sikí-ro, achí-ya. <sup>22</sup>Te máá cháa súchí-ún, ni kuxii ini-de ja súan ni ka'an-ya. Te ni kee-de kua'an-de. Te ndúkuí'a ini-de. Chi kua'a xaán ndatíñu ñáva'a-de. <sup>23</sup>Yúan-na te Jesús, ni ndakoto-ya ní xíin-yá. Te ni ka'an-ya jíin cháa káskuá'a jíin-yá: Xaan ú'u kivi iin cháa kúká ini ñuu nuu tá'ú Dios tiñu, achí-ya. <sup>24</sup>Yúan-na te cháa káskuá'a jíin-yá, kánaa ini-de kájini so'o-de tu'un ni ka'an-ya-ún. Ko ni ka'an tuku Jesús jíin-de: Hijo, cháa ja xaán káchiñú'un-de xu'un, xaán ú'u kivi-de ñuu nuu tá'ú Dios tiñu. <sup>25</sup>Yachi-ga ja'a iin camello ya yiki tikuí, vása iin cháa kúká kivi-de ñuu nuu tá'ú Dios tiñu, achí-ya. <sup>26</sup>Te máa-de, ví'i-gá kánaa ini-de, kájani ini-de: Ndé cháa kaku núsáa. <sup>27</sup>Yúan-na te Jesús, ni ndakoto-ya núu-dé. Te ni ka'an-ya: Jíin cháa ma kúu kuti, ko tú súan kúu jíin Dios. Chi taká-ni tiñu ndí'i-ni kúu sá'a Dios, achí-ya. <sup>28</sup>Yúan-na te Pedro, ni ka'an-de jíin-yá: Náa, ni kaskéndoo-ná taká ndatíñu-ná. Te ni kandikin-ná ní vai-yó, achí-de. <sup>29</sup>Te ni ka'an Jesús: Jandaa ká'an-ri jíin-ró: Nú iin cháa ni skéndoo-de ve'e-de, xí ñani-de, xí kuá'a-de, xí táa-de, xí

náa-de, xí ñásí'í-de, xí sé'e-de, xí tá'u-dé, ja sikí rúu jíin sikí tú'un va'a ká'an-ri, <sup>30</sup>te nani'in-dé iin ciento vuelta vina kúu ve'e, kúu ñani, kúu ku'a, kúu náa, kúu se'e, kúu ta'u. Ko chindikín-i-de. Ko onde inga vida chaa, yúan-na te kuchaku-de ní káni. <sup>31</sup>Te kua'a cháa kúnúu, nduu-de sandi'í-na. Te chaa sandi'í-na, ndunúu-de, áchí-ya.

### Ja ní ka'an tuku-ya já kúu-ya

<sup>32</sup>Te ká'iin-de ichi ní kaka-de kaja'an-de ñuu Jerusalén. Te Jesús, yóxnúu-ya nuu-dé. Te ni kanaa iní-de káini so'o-de. Te ñayivi káindikín-ya-ún káyu'u-i. Yúan-na te ni kana sijn tuku-ya xiní ndí'uxí uu chaa-ún. Te ni kastu'un-ya nuu-dé taká tu'un kii sikí-ya: <sup>33</sup>Ná kuní-ro: Kaa-yó kí'in-yo ñuu Jerusalén. Te yúan natuu máa Sé'e chaa nuu taká sutu' ná'nu, jíin núu cháa káchaa tutu. Te ndonda-de sikí-ya ku-ya. Te nachi'i-de-ya ndá'a cháa sijn nación. <sup>34</sup>Te chaa-ún, sákátá-de nuu-ya. Te ku'a-de ta'u-ya. Te tiví s'i'ví-de nuu-ya. Te ka'ni-dé-ya. Ko nuu uní kiví te nachaku-ya, áchí-ya.

### Favor jikán Jacobo jíin Juan nuu-ya

<sup>35</sup>Yúan-na te Jacobo jíin Juan, se'e Zebedeo, ni jakoyo-de nuu-ya. Te ni kaka'an-de jíin-ya: Maestro, kákuñ-ná ja sá'a-ní iin ja kakán-ná nuu-ní, áchí-de. <sup>36</sup>Te máa-ya, ni ka'an-ya jíin-de: Ndasá kákuñ-ro já sá'a-ri jíin-ró, áchí-ya. <sup>37</sup>Te ni kaka'an-de jíin-ya: Ku'a-ní xiin-ní kuxiukú-ná jíin-ní, iin-ná ichi ndává'a-ní, te inga-ná ichi ndávésé-ní, kiví ndúñá'nu-ní,

áchí-de. <sup>38</sup>Yúan-na te Jesús, ni ka'an-ya jíin-de: Tú káini-ro naún kúu ja kájukan-ro. Á kuu ndo'o ta'an-ro jíin-rí jíin túndó'o kii sikí-rí, xí kúu kuanducha-ro núu ní janducha-rí, áchí-ya. <sup>39</sup>Te máa-de, ni kaka'an-de: Kuu sá'a-ná, áchí-de. Te Jesús, ni ka'an-ya jíin-de: Jandáa, ja ndó'o ta'an-ro jíin-rí jíin túndó'o kii sikí-rí, te nuu ní janducha-rí, kuanducha-ro, <sup>40</sup>ko ja kúxiukú-ró ichi ndává'a-ri jíin ichi ndávésé-rí, nasu máa-rí tá'u tíñu ja ku'a-ri nuu-ro, chi ío tu'a ja kúu iin chaa, te chaa-ún ni'in, áchí-ya. <sup>41</sup>Te uxi-ga chaa-ún, ni kajini so'o-de tu'un yá'a. Te ni kakiti iní-de nuu Jacobo jíin núu Juan. <sup>42</sup>Te Jesús, ni kana-ya xiní-dé. Te ni ka'an-ya jíin-de: Káini-ro já taká chaa kábito-de nátu'un chaa kákuñá'nu nuu ñayivi, te kátá'u téyí-de tíñu nuu-í. Te ja kákuñá'nu sikí máa-de, suni kátjin ni'in so'o-de. <sup>43</sup>Ko sikí róo jíná'an-ró, na tú súan koo: Chi nú ndé róo kuní kuñá'nu nuu tá'an-ró, te róo kúu ja kuátíñu nuu tá'an-ró. <sup>44</sup>Te nú ndé róo kuní kunúu, yuán ndúu mozo nuu taká-ro. <sup>45</sup>Chi máa Sé'e chaa na tú vai-ya já kuátíñu ñayivi núu-ya, chi sua játíñu-ya núu ñayivi te ku'a-ya máa-ya ku-ya já nákuuan-ya ku'a ñayivi, áchí-ya.

### Bartimeo, chaa kuáa

<sup>46</sup>Yúan-na te ni jakoyo-ya ñuu Jericó. Te yúan ni ndenda-ya jíin cháa káskuá'a jíin-ya jíin ñayivi ku'a xáan. Te Bartimeo chaa kuáa, se'e Timeo, kánchaa-de yu'íchi, jikán-de caridad. <sup>47</sup>Te ni jini tu'un-de ja Jesús ñuu Nazaret kúu-ya. Te ni kejá'a-de kána

kó'ó-de: Jesús, Se'e David, kundá'ú iní-ní náá, áchí-de. <sup>48</sup>Te kua'a-í, nì kaka'an xaan-í nuu-dé, ja ná kasú-de yu'u-dé. Ko máá-de, ví'í-gá nì kana kó'ó-de: Tátá Se'e David, kundá'ú iní-ní náá vii, áchí-de. <sup>49</sup>Yúan-na te Jesús, nì jukuiñi-ya. Te nì ka'an-ya: Kana xini-dé ná kii-de, áchí-ya. Te nì kakana-i chaá kuáá-ún: Ma ndúkuí'a iní-ro. Ndukuiñi ná chó'o, chì kána-ya róó, áchí-i jíin cháa-ún. <sup>50</sup>Yúan-na te máá cháa-ún, nì skána-de tikachí-de. Te nì ndukuiñi-de. Te nì jaa-de nuu Jesús. <sup>51</sup>Te Jesús, nì ka'an-ya jíin-de: Naún sá'a-ri jíin-ró kuní-ro, áchí-ya. Te chaá kuáá-ún, nì ka'an-de jíin-yá: Maestro, ja ná ndúndijin nduchi-ná kuní-ná, áchí-de. <sup>52</sup>Te Jesús, nì ka'an-ya jíin-de: Kuá'an núsáá. Ja kándíja-ró ní nama róó, áchí-ya. Te nì ndundijin-ni nduchi-dé. Te nì ndikín-de Jesús kua'an-de ichi-ún jíin-yá.

### Ja ní kivi Jesús ñuu Jerusalén

**11** Te nì kakuyani-ya ñuu Jerusalén, ñuu Betfagé, jíin ñuu Betania, chij yuku Olivos. Te nì táji-yá uü chaá káskuá'a jíin-yá kua'an-de. <sup>2</sup>Te ká'an-ya jíin-de: Kuá'an ñuu kánchaá nuu-ro jían. Te nuu kivi-ni-ró yúan, te ni'in-ro ñin burro nú'ni-ti, ja ní ñin chaá té koso-gá-de-ti. Te ndáji-ró-ti, te kii-ró jíin-ti. <sup>3</sup>Te nú ndé chaá ká'an jíin-ró: Naja sá'a-ró súan, achí-de. Te kachí-ro kúni-de: Máá Jíto'o-yo jínu ñú'ún-yá-ti, achí-ro. Yúan-na te táji-ni-de-ti kii-ró jíin-ti, áchí-ya jíin-de. <sup>4</sup>Te nì kaja'an-de. Te nì kani'in-dé burro-ún nú'ni-ti

yúxé'é ichi yatá ké'e, nuu náketá'an uü ichi. Te nì kandáji-de-ti. <sup>5</sup>Te sava ja ká'jin yúan, nì kaka'an jíin-de: Naún kásá'a-ró sá burro jian kándáji-ró, áchí. <sup>6</sup>Yúan-na te máá-de, nì kaka'an-de jíin-ún, nátu'un nì tá'ú Jesús tiñu nuu-dé. Te vasa ní kasía-ún-de vai-de. <sup>7</sup>Te nì chaá-de jíin burro-ún nuu Jesús. Te nì kaxndée-de tikachí-de siki-ti. Te nì jukoso-yá-ti. <sup>8</sup>Te kua'a-dé, nì kajakín-de tikachí-de iní ichi, te sava-ga-de, nì kaja'nu-de numa yúnu. Te nì kajakín-de iní ichi-ún. <sup>9</sup>Te ñayivi kája'an ichi núu-yá, jíin ñayivi kándikín ichi yatá-yá, káka'an jaa-i: Xáan va'a I'a kúu-ya. Ná nákana jaa-yó-yá, chì ndíso-ya tiñu máá Tatá Dios. <sup>10</sup>Te kákusiñ iní-yo, chì táa-yo David, a yani tá'ú-de tiñu nuu-yo. Xáan va'a I'a kúu-ya ondé andívi, áchí-i. <sup>11</sup>Te nì kivi Jesús iní ñuu Jerusalén, jíin iní ve'e i. Te nì ndakoto-ya núu táká ndatíñu ñin ní yúan. Te nuu ní ini, te nì kenda-ya kuá'an-ya ñuu Betania jíin máá uxí uü-de.

### Tu'un mérkexe

<sup>12</sup>Te kivi xían-ún, nì kakenda-ya kuá'an-ya iní ñuu Betania. Te nì chaá soko chij-ya. <sup>13</sup>Te ondé jiká ní jini-ya ñin mérkexe ja ío numa ndá'a. Te nì kandita-ya kuá'an-ya, jáni iní-ya já ni'in-yá ja kée-yá núu. Te nuu ní jaa-ya núu mérkexe-ún, tú kuti naún ní ni'in-yá, chì máá núma-ní ío. Chì nasu kivi kúun nde'e kúu. <sup>14</sup>Yúan-na te Jesús, nì ka'an-ya: Ni ñin tuká naún kée kúti ndé'e xini-ro ní káni, áchí-ya jíin mérkexe-ún. Te chaá káskuá'a jíin-yá, nì kajini so'o-de ja súan nì ka'an-ya.

### Ja ní sándoo-ya vé'e ii

<sup>15</sup>Te ni jakoyo-ya ñúu Jerusalén. Te ni kivi Jesús iní ve'e ii. Te ni kiñi'in-ya ñáyivi kájaan káxikó iin-i iní ve'e ii-ún kája'an-i. Te ni skuíó káni-ya mesa cháa káxndái xü'ún, jíin silla cháa káxikó paloma. <sup>16</sup>Te tú ní já'a-ya tú'un ja'a ni iin-i jíin káyi iní ve'e ii-ún. <sup>17</sup>Te ni stá'an-ya tú'un nuu-í: Á tú yóso núu tutú ja vé'e-ri, ve'e nuu kájikān ta'u táká ñáyivi nání. Ko máá-ró, a ni kanasá'a-ró yaú kava ñáku'iná, áchí-ya. <sup>18</sup>Te cháa káchaa tutu jíin sutú ñá'nu, ni kajini so'lo-de tu'un-ún. Te kándúkú-de modo ndasa ka'ni-dé-ya. Ko káyu'ú-de-ya, chi taká ñáyivi kánaa iní-i kájini so'lo-i tu'un stá'an-ya. <sup>19</sup>Te nuu kuá'ini, te ni kenda Jesús iní ñuu-ún, kua'an-ya.

### Ja ní ichi mérkexe

<sup>20</sup>Te jañá'an inga kivi, ni kanaja'a-ya kuá'an-ya. Te ni kajini-ya mérkexe-ún ja á ni ichi onde yo'lo. <sup>21</sup>Yúan-na te ni nuku'un iní Pedro. Te ni ka'an-de jíin-yá: Maestro, nde'é-ní mérkexe-ún ja ní ka'an ndiva'a-ní jíin. Te vina a ni ichi ii, áchí-de. <sup>22</sup>Te Jesús, ni ka'an-ya jíin-de: Kandíja nuu Dios, <sup>23</sup>chi jandáa ká'an-ri jíin-ró: Nú ndé cháa ka'an-de jíin yúku yá'a: Kuxio, te jungoo-ró onde nuu mar, te nú tú kani síkí iní-de, chi sua kándíja-de ja súan kuu ja ní ka'an-de-ún, te ja ní jikan-de-ún, ni'in-dé. <sup>24</sup>Ja yúan ká'an-ri jíin-ró: Taká ja jikán-ro, te kakan ta'u-ro jíin, te ná kándíja-ró ja ní'in-ro, te ni'in-ro. <sup>25</sup>Te nú kájikān ta'u-ro, te kuña ká'nu

iní-ro núu ndé iin cháa jíto u'u róó, náv'a máá Taa-ro kánchaa-ya onde andíví, suni kuña ká'nu iní-ya núu kuáchi-ró. <sup>26</sup>Chi nú tú kuña ká'nu iní-ro, suni súan máá Taa-ro kánchaa-ya onde andíví, ma kuña ká'nu iní-ya núu kuáchi-ró, áchí-ya.

### Sikí tñnu ndíso Jesús

<sup>27</sup>Te ni najakoyo tuku-ya ñúu Jerusalén. Te jika kuu-ya iní ve'e ii. Te sutu ñá'nu, jíin cháa káchaa tutu, jíin cháa ni kayii, ni chakoyo-de nuu-yá. <sup>28</sup>Te ni kaka'an-de jíin-yá: Na jíin tú'un sá'a-ró tñnu yá'a. Te ndéja ní ka'an jíin-ró sá'a-ró tñnu yá'a, áchí-de. <sup>29</sup>Te Jesús, ni ka'an-ya jíin-de: Ná kaká tu'un-rí róó iin tu'un, te kachi-ro núu-rí. Yúan-na te ná kachi-ri nuu-ro na jíin tú'un sá'a-ri tñnu yá'a. <sup>30</sup>Ja ní skuánducha Juan sáá, á onde andíví ní kii tu'un, xí cháa ni tá'ú tñnu. Kastu'ún, áchí-ya. <sup>31</sup>Yúan-na te ni kandatu'ún máá-de: Nú ka'an-yo: Ja onde andíví. Te kachi-de kuni-yó: Naja tú ní kákandíja-ró núu-dé núsáá. <sup>32</sup>Te nú ka'an-yo já cháa ni tá'ú tñnu. Te káyu'ú-yo ñáyivi, chi ndivii-í kájani ndaa iní-i ja cháa ni jani tu'un Dios ni kuu Juan, áchí-de jíin tá'an-de. <sup>33</sup>Ja yúan ní kaka'an-de: Tú kájini-ri, áchí-de jíin Jesús. Yúan-na te ni ka'an Jesús: Suni ruu, tú kachi-ri nuu-ro na jíin tú'un sá'a-ri tñnu yá'a núsáá, áchí-ya jíin-de.

### Chaa kásatiñnu nuu itú uva

**12** Te ni keja'á-yá ni ka'an-ya tú'un yátá jíin-de jíná'an-de: Iin cháa, ni nachu'un-de iin itú uva. Te ni jasú-de jakú. Te ni jacha-de iin yaú nuu kaxín-de. Te ni ndukani-de

iin torre. Te ni xndóo-de nuu cháa kásatiñu jíin. Te ni kee-de kua'an jíká-de. <sup>2</sup>Te iin kivi te ni tájí-de iin mozo-de vai nuu já kásatiñu jíin uva-ún, ja vái naki'in-de nde'e itú uva nuu já ní kásatiñu-ún. <sup>3</sup>Ko máá-ún, ni kakatiin-ún mozo-de. Te ni kastují-dé. Te ni kakiñi'in-ún-de. kuano'on sáni-ni-de. <sup>4</sup>Te máá jíto'o, ni natájí tuku-de inga mozo-de vai nuu já kásatiñu-ún. Te ni kastují-ún xiní mozo-de. Te ni kasákátá nuu-dé. Te ni kakiñi'in-ún-de kuano'on-dé. <sup>5</sup>Te máá jíto'o uva, ni natájí tuku-de inga chaá vai. Te ni kaja'ni-ún-de jíin kuá'a-gá-de. Te sava-de ni kastují. Te sava-de ni kaja'ni. <sup>6</sup>Ko máá jíto'o, ío iin se'e-de ja kúndá'ú ini-de. Te onde sandí'f-na ni tájí-de se'e-de vai nuu cháa kásatiñu. Te ni ka'an-de: Ná koo jíñú'ún yúan núu sé'e-ri, áchí-de. <sup>7</sup>Ko máá já kásatiñu-ún, ni kandatu'ún: Chaá yá'a xíin tá'u. Ná chó'o, ná ká'ni-yo-dé, te ná ndoo ta'u-dé kuu-yó, áchí. <sup>8</sup>Te ni kakatiin-ún sé'e-de. Te ni kaja'ni-ún-i. Te ni kaskána ndi'yi-ún yatá itú uva. <sup>9</sup>Ndasa sá'a jito'o itú uva-ún núsáá. Chaá-de, te xnáa-dé ja ní kásatiñu-ún. Te kua'a-de itú uva-ún nuu sava-ga chaá, áchí-ya. <sup>10</sup>Ni tutu i' yá'a té ka'u-ga-ro náún. Yuu já ní kaské'ichí chaá kácutá'an, ya'á kúu máá yúu ndíso fuerza jiki. <sup>11</sup>Máá Tatá Dios, ni sá'a-ya súan. Te kánaa iní-yo ndé'é-yó tíñu yá'a, áchí-ya jíin-de. <sup>12</sup>Te kándúkú-de modo tiin-de-ya. Chi ni kajuku'un ini-de ja sikí máá-de kúu tu'un yatá ní ka'an-ya-ún. Ko ni kayu'ú-de ni kajito-de ñayivi. Te ni kaxndóo-de-ya, te kája'an-de.

### Siki xú'ún yóo

<sup>13</sup>Te ni katájí-de sava chaá fariseo jíin chaá herodiano kája'an-de nuu-yá, náva'a tiin yatá-de-ya jíin yakú tu'un. <sup>14</sup>Te ni chakoyo-de. Te ni kaka'an-de jíin-yá: Maestro, kájiní-ná ja ká'an ndaa-ní. Te tú yú'ú-ní jito-ní ni iin chaá, chí tú ndé'é-ní ndasa jíto taká chaá, chí sua stá'an ndaa-ní ichi Dios. Á kuu kua'a-yó xú'ún yóo nuu César, xí túu. Á kua'a-yó, xí ma kuá'a-yó, áchí-de jíin-yá. <sup>15</sup>Yúan-na te máá-yá, a ni juku'un ini-ya já xndá'ú-de-ya kákuñi-de. Te ni ka'an-ya jíin-de: Naja kájito nchaá-ro rúu. Kua'a xu'ún jián ná kii nde'é-rí, áchí-ya. <sup>16</sup>Te máá-de, ni kaja'a-de xu'ún-ún nuu-yá. Te ni ka'an-ya jíin-de: Ndé chaá kúu chaá ncháa nuu yá'a, jíin tú'un yóso yá'a, áchí-ya. Te ni kaka'an-de jíin-yá: César kúu, áchí-de. <sup>17</sup>Te Jesús, ni ka'an-ya jíin-de: Kua'a ja xiin César nuu César, te ja xiin Dios nuu Dios, áchí-ya. Te ni kánaa xáan ini-de ni kajini so'o-de tu'un ni ka'an-ya.

### Siki já náchaku ndi'yi

<sup>18</sup>Yúan-na te ni chakoyo chaá saduceo nuu-yá. Te chaá-ún, káka'an-de ja tú nachaku kuti ndíyi. Te ni kajika tu'un-de-ya: <sup>19</sup>Maestro. Moisés, ni chaá-de tutu ni ndoo jíin-yó, nú ñani iin chaá kuu-de, te ndoo ñasí'f-de, te nú tú se'e-de ní ío, te ñani-de naki'in ñasí'f-de, te nandakin-de tata ñani-de, áchí tutu-ún. <sup>20</sup>Te ni ka'io usia ñani. Te chaá núú, ni tanda'a-dé. Yúan-na te ni ji'i-de. Te tú ní xndóo-de tata-de. <sup>21</sup>Te chaá uu, ni naki'in-de-ña.

Te ni jil'i-de. Te ni cha-a-ún, tú ní xndóo-de tata-de. Te cha-a uni, suni súan. <sup>22</sup>Te ndí'usiá-de, ni kanchaka-de-ña. Te tú ni iin-de ní xndóo-de tata. Te onde sandí'í-na te ni jil'i máá ñá'an-ún. <sup>23</sup>Núsáá te kivi náchaku taká ndiyi, ja náchaku máá ñaní jíná'an-de, te ndé iin-de kuu-ña ñásí'í-de, chi ndí'usiá-de, ni kanchaka-de-ña, áchí-de jíin-yá. <sup>24</sup>Yúan-na te Jesús, ni ka'an-ya jíin-de: Tú kájuku'un iní-ro jíin tutú i, ni jíin fuerza Dios. Yuán ní kastíví-ró tú'un. <sup>25</sup>Chi kivi náchaku-de ma'ñú ndíyi, ni tuká tãnda'a kúti-dé, ni ma nãtãnda'a máá-ña. Chi nduu-de nátu'un ndajá'a ká'io andívi. <sup>26</sup>Te siki ndíyi ja náchaku, á té ka'u-ga-ro tutú Moisés, ndasa ni ka'an Dios jíin-de ma'ñú yukú: Máá-rí kúu Dios Abraham, Dios Isaac, Dios Jacob, áchí-ya jíin Moisés. <sup>27</sup>Ko nasu Dios cha-a ni kajil'i kúu-ya, chi sua Dios cha-a káichaku kúu-ya. Xa-a kastíví-ró tú'un núsáá, áchí-ya jíin-de.

#### **Tu'un tá'ú tíñu kánúú xáan-gá**

<sup>28</sup>Te iin cha-a cháa tutu ni jini so'lo-de kástátá'an-de, ni ja-a-de. Te ni jini-de ja vá'a ni nachísó-yá tu'un nuu-dé. Te ni jika tu'un-de-ya: Ndé tu'un kánúú xáan-gá nuu taká tu'un ni tá'ú-yá tíñu sáá, áchí-de. <sup>29</sup>Te ni ka'an Jesús jíin-de: Ya'á kúu tu'un kánúú xáan-gá nuu taká-ga: Kuni so'lo Israel, máá Tatá-yo Dios, máá iin-ni-ya ío. <sup>30</sup>Núsáá te kumani-ro jíin máá Tatá-ro Dios onde jíin iní jíin añú-ro, jíin níí núu jiní tuní-ro, jíin níí fuerza-ro. Ya'á kúu tu'un tá'ú tíñu kánúú

xáan-gá. <sup>31</sup>Te tu'un uu kúu suni nátu'un inga-ún: Kundá'ú iní-ro tá'an-ró nátu'un kúndá'ú iní-ro máá-ró. Tuká inga tu'un tá'ú tíñu kánúú-ga ío, chi ya'á-na, áchí-ya jíin-de. <sup>32</sup>Yúan-na te cha-a cháa tutu, ni ka'an-de jíin-yá: Jandáa Maestro, va'a ká'an-ní, chi Dios iin-ni-ya ío, te tuká inga Dios ío. <sup>33</sup>Te kumani-yo jíin-yá onde jíin iní jíin añú-yo, jíin níí núu jiní tuní-yo, jíin níí fuerza-yo, te kundá'ú iní-yo tá'an-yo nátu'un kúndá'ú iní-yo máá-yo, kánúú xáan-gá ya'á vásá já ká'mu-yo kiti jíin taká kiti ká'ni-yo núu-yá, áchí-de jíin-yá. <sup>34</sup>Yúan-na te ni jini Jesús ja vá'a xa-a ní xndíó káni-de tu'un. Te ni ka'an-ya jíin-de: A yani kuu kivi-ró ñuu nuu tá'ú Dios tíñu, áchí-ya. Te ni iin-de, tuká ní chúndéé iní-de kaka tu'un-de-ya:

#### **Siki Sé'e David**

<sup>35</sup>Te ni stá'an Jesús iní ve'e i. Te ni ka'an-ya: Naja káka'an cha-a káchaa tutu ja Cristo kúu Se'e David. <sup>36</sup>Chi suni máá David, ni ka'an-de ni sá'a Espiritu Santo jíin-de: Máá Tatá Dios ni ka'an-ya jíin Jító'o-ri: Nungoo-ró íchi ndává'a-ri, te ná chúkú-rí cha-a kájito u'u róo, kuu-de teyu kuxndíi ja'a-ro, áchí Dios. Achí David. <sup>37</sup>Chi suni máá David, Jító'o, ni ka'an-de jíin-yá. Te ndasa kuu máá-yá se'e-de núsáá, áchí-ya. Te taká ñayivi ndá'ú, ni ka'io iní ni ka'io añú-i ni kajini ná'in-i ja ká'an-ya.

#### **Siki já ní kana jíin-yá nuu-í**

<sup>38</sup>Te ni stá'an-ya tú'un. Te ni ka'an-ya jíin-i: Koto-ró máá-ró núu cháa káchaa tutu. Chi kákuni-de



kaka-de jíin sún̄nu káni. Te kákuni-de ja ká'an sa'an-yo jíin-de nu'yá'u. <sup>39</sup>Te silla onde xini mesa ini ve'e sinagoga, jíin silla xini mesa nuu ío xini kákuni-de. <sup>40</sup>Te cha'a yá'a kákókó-de ve'e ña'an kéndoo ndá'ú, te kásá'a-de ja túu kuachi-de, yuán kájikan ta'u ná'an-de. Cha'a yá'a ví'í-gá ta'nu ndatu-de, áchí-ya.

**Ja ní soko ñá'an viuda xu'ún**

<sup>41</sup>Te kánchaa Jesús ichi núu janú nuu kásoko-í xu'ún. Te ndé'é-yá ndasa káchu'un kua'a ñáyivi xú'ún ini janu-ún. Te kua'a cháa kúká, ni káchu'un téyíí-de. <sup>42</sup>Te ni cha'a iin ña'an ní kéndoo ndá'ú. Te ni chindee-ña úu xu'ún yá'kí náa, ja kúu iin centavo. <sup>43</sup>Yúan-na te ni kana-ya xini cháa káskuá'a jíin-yá. Te ni ka'an-ya jíin-de: Jandáa ká'an-ri jíin-ró, ja ñá'an ní kéndoo ndá'ú yá'a, ni chu'un-ga-ña vásá táká ñáyivi ní káchu'un ini janu-ún. <sup>44</sup>Chi taká-i, ni káchu'un-i ja ní ndendoso sikí-í. Ko ña'an yá'a, vasa kúndá'ú-ña, ko ni chu'un ndi'i-ña ja ñáva'a-ña, onde jíin táká ja kúchaku-ña, áchí-ya jíin-de.

**Tuni nuu kúyani ncha'a Jesús**

**13** Te ni ndenda-ya ini ve'e ij. Te iin cha'a skuá'a jíin-yá, ni ka'an-de jíin-yá: Maestro, ndé'é-ní ná xa'an lúu yuu te luu ve'e ío, áchí-de. <sup>2</sup>Te Jesús, ni ka'an-ya jíin-de: Á ndé'é-ró núu táká ve'e ná'nu yá'a. Ma kútá'an-ga ni iin yuu, chi iin kivi te ndi'i ndua, áchí-ya. <sup>3</sup>Te ni jungoo-ya onde yuku Olivos, ichi núu vé'e ij. Te Pedro, Jacobo, Juan, jíin Andrés, ni kajika tu'ún siin-de-ya: <sup>4</sup>Kastu'ún-ní

nuu-ná. Ndé kivi koo taká tiñu yá'a. Te naún tuni koo nuu kúyani cha'a taká tiñu yá'a, áchí-de. <sup>5</sup>Te Jesús, ni kejalá'-yá ká'an-ya jíin-de: Koto-ró máa-ró jín'an-ró, nává'a tú xndá'ú ni iin-de róó. <sup>6</sup>Chi kikoyo kua'a cháa ki'in núu-de sí'ví-rí, te ka'an-de: Máa-rí kúu Cristo, achi-de. Te xndá'ú-de kua'a xa'an ñáyivi. <sup>7</sup>Te nú ni kajini tu'un-ró káka'an ja ío guerra xí ja koo guerra, te ma yú'ú-ro. Chi kánúu koo súan. Ko té jinu-ga kivi. <sup>8</sup>Chi ndonda nación sikí nación, te nuu sikí núu. Te yá'a yúan taan, te ni'in, te koo tama, te ni'in ñáyivi. Ya'a kákuu tundó'o kéjalá'á núu.

**Tu'un ndasa ndo'o ñáyivi kákandija**

<sup>9</sup>Te koto-ró máa-ró, chi nastúu-de róó nuu junta. Te ini ve'e sinagoga xndó'o-de róó. Te onde nuu gobernador jíin núu rey kana-de xini-ro ja sikí rúu. Te kani ndaa-ro tú'un nuu-dé. <sup>10</sup>Te jínu nū'ún ja xná'an-ga kuicha tu'un va'a-ri nuu táká ñáyivi. <sup>11</sup>Te nú kinchaka-de róó, ja nastúu-de róó, ma ná'kani tu'a ini-ro ndasa ka'an-ro jíin-de. Chi ja kuá'a-ya núu-ro hora jian, yuán ká'an-ro. Chi nasu máa-ró ká'an, chi Espiritu Santo ka'an, áchí-ya. <sup>12</sup>Te ñani jíin ñaní nastúu tá'an ja ná kúu. Te táa jíin sé'e, te se'e-ún ndonda sikí táa, te ka'ni tá'an. <sup>13</sup>Te taká ñáyivi, koto u'u-i róó ja sikí rúu. Ko cha'a kundij ni'in onde kivi jínu, cha-a-ún kaku, áchí-ya. <sup>14</sup>Ko nú ni kajini-ro ja káchá'an te ni tucha taká ndatiñu nuu má kúu kuti koo súan núu, natu'un ni ka'an Daniel cha'a ni jani tu'un Dios (cha'a ká'u, ná júku'un

ini-de), yúan-na te ñayivi káxiukú iní nuu Judea, ná kúnu-i kingoyo-i onde yuku. <sup>15</sup>Te chaa kánde xini vé'e, ma núu-de ndívi-de ini vé'e ki'in-de ndatínu-de. <sup>16</sup>Te chaa kánde onde rancho, ma náxió káva yátá-de náki'in-de tikachí-de ichi yatá-dé. <sup>17</sup>Ko kivi-ún naka ndá'ú kuu ja káñu'un se'e, jín ja káskáxin-í. <sup>18</sup>Ná kakán ta'u-ro núsáa, náva'a tú kunu-ró máa víko vjín ki'in-ro. <sup>19</sup>Chi kivi-ún koo tundó'o, ja té tuká koo onde kivi ní sá'a Dios ñuyívi, te onde vina, te ni ma koo-ga. <sup>20</sup>Te nú máa Tatá Dios, tú ní náxndíyi-ya kivi-ún núú, ni iin chaa ma káku kuti-dé núú. Ko ja sikí cháa ni nakaji-ya, yuán ní naxndíyi-ya kivi-ún.

#### Tuni máa kivi sándí'i-na

<sup>21</sup>Núsáa te nú ndé chaa ká'an jín-ró: Yá'a ndé'é-ró kánchaa Cristo, xí: Yúan ndé'é-ró kánchaa-ya, ma kándíja-ró ja ká'an-de. <sup>22</sup>Chi kenda Cristo xndá'ú, jín cháa kani tu'un tú'ún. Te sá'a-de tuni tiñu ñá'nu xaan, náva'a xndá'ú-de onde chaa ni nakaji-ya, te nú ná kúu sá'a-de. <sup>23</sup>Koto-ró máa-ró, chi a ni kachi ndí'i-ri nuu-ro, áchí-ya. <sup>24</sup>Te kivi ndí'i koo tundó'o-ún, kutúún ndikandii, te yoo ma ndíi-gá. <sup>25</sup>Te tiñuú xíní, jungoyo-ti ichi ándívi kíi-ti. Te taká fuerza ándívi, ndí'i ka'ya. <sup>26</sup>Yúan-na te kuni ñayivi núu máa Sé'e chaa kii-ya ichi ándívi núu vikó nu'ún jín kuá'a fuerza ja ndúñá'nu-ya. <sup>27</sup>Yúan-na te tájí-yá ndajá'a-yá kingoyo. Te nastútú-yá ñayivi ní nakaji-ya ndákúun lado ñuyívi, onde nuu ndí'i ñu'un, te onde nuu ndí'i ándívi. <sup>28</sup>Vina te

skuá'a-ró ndasa sá'a yunu mérkexe. Nú a ni nduyúcha núma, te ni najaa nda'a, te a kájiní-ro ja á ni kuyani viko sáú. <sup>29</sup>Suni súan róó, nú a ni kájiní-ro kuákuu taká tiñu yá'a, te kuni-ro ja á yani ja kivi-ún. <sup>30</sup>Jandáa ká'an-ri jín-ró ja má náa ñayivi yá'a, onde ná skíkuu taká tiñu yá'a. <sup>31</sup>Ándívi jín ñuyívi chi naa, ko tu'un ká'an-ri chi ma náa.

#### Sikí ja kúndito-i

<sup>32</sup>Ko kivi koo-ún, jín hora, tú ni iin chaa jiní, ni ndajá'a ká'io ándívi, ni máa Sé'e-ya, chi máa iin-ni máa Táa-yo Dios jiní-ya. <sup>33</sup>Koto-ró máa-ró, te kundito-ró, te kakan ta'u-ro. Chi tú kájiní-ro na kivi koo. <sup>34</sup>Chi nátu'un iin chaa kua'an jíká-de. Te ni xndóo-de ve'e-de. Te ni ja'a-de tu'un nuu mozo-de, ná tiñu sá'a iin iin-de. Te chaa ndíto yuxé'é, ni ta'u tiñu nuu-dé, ná kúndito-de. <sup>35</sup>Núsáa te kundito-ró, chi tú kájiní-ro na hora nchaa jito'o ve'e-ún, á aini, á ñúú, á kána lí'li, á jañá'an. <sup>36</sup>Chi sánaa ini-ro te nchaa-ni-ya. Te ni'in-yá róó kákixi-ro. <sup>37</sup>Te taká tu'un ká'an-ri jín-ró yá'a, suni ká'an-ri jín ndívi-i jíná'an-i. Kundito jíná'an-ró, áchí-ya.

#### Ja ní kanatiin tu'un tá'an sikí Jesús

**14** Te uu-ga kivi te vásá ní kuu Pascua jín víko koo statilá tú yí'i yujan íá. Te sutu ñá'nu jín cháa káchaa tutu, ni kándúkú-de modo ndasa xndá'ú-de-ya te tiin-de-ya. Te ka'ni-dé-ya kákuñi-de. <sup>2</sup>Te ni kaka'an-de: Ma kúu sá'a-yó máa kivi víko, chi nú súan te ndonda vaá ñayivi, áchí-de.

### Jesús jíin nǎ'an ndíso perfume

<sup>3</sup>Te kándeeyá nūu Betania, kánchaa-yá nūu mesa ve'e Simón cháa télyu ndí'yi. Te nī cháa iin nǎ'an, kándá'a-ña iin tiya'a nū'un perfume máá nían ita nardo kúu. Te ncháa ya'u téyíí. Te nī tá'u-ña tíya'a-ún. Te nī chu'un-ña xiní-yá. <sup>4</sup>Te sava, nī kakitj ini. Te nī kaka'an: Naja náa perfume jian. <sup>5</sup>Chī kuu kuyá'u ví'lí-gá unī ciento peso, te kuá'a-yó nūu náyivi ndá'ú nūu, áchí. Te nī kaka'an vaá siki-ñá. <sup>6</sup>Ko Jesús, nī ka'an-ya: Sía-ña. Naja kástá'an-ro-ñá. Tiñu va'a sá'a-ña jíin-rí, áchí-ya. <sup>7</sup>Chī nene káxiukú náyivi ndá'ú jíin-ró. Te nú kákun-ro te kuu sá'a va'a-ró jíin-i. Ko ruu, na tú nene kánchaa-ri jíin-ró. <sup>8</sup>Ya'a-ni nī kuu nī sá'a-ña. Chī a nī chí'i tu'a-ña perfume yiki kúñu-ri kivi yúji-ri. <sup>9</sup>Jandaa ká'an-ri jíin-ró, ja níí nūyívi nú ná kuicha tu'un va'a yá'a, te tiñu nī sá'a-ña yá'a, suni koo tu'un nává'a ná nūku'un ini-i-ña, áchí-ya. <sup>10</sup>Yúan-na te Judas Iscariote, iin ja uxí uu yúan, kua'an-de nuu sutú nǎ'nu ja nastúu-de-ya. <sup>11</sup>Te súan nī kajini so'o sutu-ún. Te nī kakusií ini. Te nī kakeyu'u ja kuá'a xu'ún nūu-dé. Te ná ndúkú-de modo ndasa nastúu-de-ya.

### Viko lélú Pascua

<sup>12</sup>Te máá kivi kējá'a víko koo statilá tú yí'i yujan ía, suni máá kivi kásoko-dé lélú Pascua, te cháa káskuá'a-ún, nī kaka'an-de jíin-yá: Ndénu kuni-ní ná kísátu'a-ná nuu kée-ní lélú Pascua, áchí-de. <sup>13</sup>Te nī táji-yá uu cháa káskuá'a

jíin-yá kua'an-de. Te nī ka'an-ya jíin-de: Kuá'an onde nūu. Te yúan ketá'an-ró jíin iin cháa ndíso iin kivi nducha. Te kundikin-ro-dé ki'in-ro jíin-de. <sup>14</sup>Te nuu ndívi-de, yúan ka'an-ro jíin máá jito'o ve'e-ún: Achí máá Maestro: Ndénu ío iin ve'e kuá'a nūu-ní nuu kée-ná lélú Pascua jíin cháa káskuá'a jíin-ná, achí-ro. <sup>15</sup>Te máa-de, ná stá'an-de iin cuarto ká'nu onde xiní vé'e nuu-ro, yúan a ío tu'a. Te yúan sátu'a-ró ndasa kuu-yó, áchí-ya jíin-de. <sup>16</sup>Te kaja'an cháa káskuá'a jíin-yá. Te nī jakoyo-de nūu-ún. Te nī kani'in-dé nátu'un nī ka'an-ya jíin-de. Te nī kasátu'a-de ndasa kuxini-de lélú Pascua. <sup>17</sup>Te nī ini. Te kua'an-ya jíin máá uxí uu cháa-ún. <sup>18</sup>Te káxiukú-de nuu mesa káyee-dé staa. Te nī ka'an Jesús: Jandaa ká'an-ri jíin-ró, ja iin róo, ja yée jíin-rí, nastúu-ró rúu, áchí-ya. <sup>19</sup>Yúan-na te nī kakuxíí ini-de. Te nī kajika tu'ún ná iin ná iin-de-ya: Ja náa náún, ja náa náún, ká'an iin-de, ká'an inga-de. <sup>20</sup>Te nī ka'an-ya jíin-de: Iin ja uxí uu ja chíxí'ú nūu kó'o jíin-rí kúu, áchí-ya. <sup>21</sup>Chī jandaa máá Sé'e cháa ki'in-ya nátu'un yóso tú'un-ya nūu tutú. Ko naka ndá'ú kúu cháa nastúu máá Sé'e cháa. Va'a-ga nú tú ní kaku cháa-ún nūu, áchí-ya. <sup>22</sup>Te káyee-dé. Te nī ki'in Jesús staa. Te nī jikan ta'u-yá. Te nī sakuáchí-yá. Te nī ja'a-ya nūu-dé. Te nī ka'an-ya: Kee jíná'an-ró. Ya'a kúu yiki kúñu-ri, áchí-ya. <sup>23</sup>Te nī ki'in-ya iin taza. Te nī jikan ta'u-yá. Te nī ja'a-ya nūu-dé. Te ndí'i-de, nī kaji'i-de. <sup>24</sup>Te nī ka'an-ya jíin-de: Ya'a kúu niñi-rí ja sá'a contrato jaá. Te ja siki náyivi

kuá'a te nì jati. <sup>25</sup>Te jandáa ká'an-ri jíin-ró: Ma kó'o-ga-ri nducha ndé'e uva, onde kivi náko'o-ri ja jáa iní ñuu nuu tá'ú Dios tiñu, áchí-ya. <sup>26</sup>Te nì kajita-ya ñin yaa ii. Te nì kenda-ya kája'an-ya onde yuku Olivos. <sup>27</sup>Yúan-na te Jesús, nì ka'an-ya jíin-de: Ndivii-ro, nayu'ú-ro ja sikí rúu akuáa vína. Chì a yóso núu tutú: Stují-rí chaá ndíto rií, te máa ríi-ún, kuicha-ti, áchí. <sup>28</sup>Ko nuu náchaku-ri, te xna'an-ga ruu ki'in-ri ñuu Galilea vása róo, áchí-ya. <sup>29</sup>Ko Pedro, nì ka'an-de jíin-yá: Vasa ndivii-dé ná náyu'ú-de, ko náa chi túu, áchí-de. <sup>30</sup>Te Jesús, nì ka'an-ya jíin-de: Jandáa ká'an-ri jíin-ró, chi róo, akuáa vína, onde ná té kana-ga lí'li uu jínu, te ma kuátu'un-ró rúu unì jínu, áchí-ya. <sup>31</sup>Ko máa-de, téyí ní ka'an-de: Vasa ná kúu-ná jíin-ní, ko ma kasú-ná yu'u-ná ja kúu ní, áchí-de. Te suni súan nì kaka'an ndi'i-de.

### Jesús inì Jardín Getsemaní

<sup>32</sup>Te nì jakoyo-ya ñin nuu nánì Getsemaní. Te nì ka'an-ya jíin cháa káskuá'a jíin-yá: Yá'a-ni jungoo-ró nini ná kakán ta'u-ri, áchí-ya. <sup>33</sup>Te nì jaka-ya Pedro jíin Jacobo jíin Juan kája'an-de jíin-yá. Te nì kejá'a-yá yú'ú-ya, te ndúkuí'a inì-ya. <sup>34</sup>Te nì ka'an-ya jíin-de: Xaan ndúkuí'a inì-ri, chi a yani kuu-ri. Yá'a kundatu-ró, te kundito-ró, áchí-ya. <sup>35</sup>Te nì kanduu-ya ñin tí'lí. Te nì jukuíni jíití-yá nuu ñu'un. Te nì jikán ta'u-yá, te nú kuu kaku-ya hora-ún. <sup>36</sup>Te nì ka'an-ya: Abba, Taa. Taká tiñu kúu sá'a máa-ní. Chaxio-ní tundó'o-ná yá'a ná kí'in. Ko nasu ja kuní máa-ná, chi

ja kuní máa-ní ná kúu, áchí-ya. <sup>37</sup>Te nì ncha-ya. Te nì jini-ya já kákixi-de. Te nì ka'an-ya jíin Pedro: Simón, kixi-ro náún. Á tú kánda-ró kúndito-ró vasté ñin hora. <sup>38</sup>Kúndito, te kakan ta'u-ro, náva'a ma kóto ncha-ún róo. Chì kuní ndija añu-ro, ko yiki kúnu-ró chi túu, áchí-ya. <sup>39</sup>Te kua'an tuku-ya. Te nì jikán ta'u-yá. Suni ñin-ni tu'un nì ka'an-ya. <sup>40</sup>Te nì ncha-ya. Te nì jini tuku-ya-dé kákixi-de, chi xaan káji'i-de numá'ná. Te tú kútuní ndasa xndió káni-de tu'un nuu-yá. <sup>41</sup>Te nì ncha-ya vuelta unì. Te nì ka'an-ya jíin-de: Kusú te ndetátu-ro-ná. A nì kuu. Vina te nì ja hora ja máa Sé'e chaá natuu-ya núu ndá'a cháa ká'io kuachi. <sup>42</sup>Ndukoo, ná ch'ó. Chì ja nástuu ruu, a nì kuyani vai, áchí-ya.

### Ja ní kakatiin-de Jesús

<sup>43</sup>Te súan ká'an-ya, te nì cha-ñi Judas, ñin ja uxí uu-ún. Te ñin nuu já káchindéé tá'an jíin-de, jíin machete jíin yúnu vái koyo jíin-de. Chì sutu ñá'nu jíin cháa káchaa tutu jíin cháa nì kayii, nì katáji cháa-ún. <sup>44</sup>Te chaá nì nastuu-ya-ún, nì ja'a-de ñin tuni, te nì ka'an-de: Chaá tíyú'ú-rí-ún, yúan kúu. Katiin jíná'an-ró, te kunchaka-ró kí'in-ro jíin, áchí-de. <sup>45</sup>Yúan-na te nì cha-de. Te nì kandita-ni-de nuu-yá. Te nì ka'an-de jíin-yá: Maestro, Maestro, áchí-de. Te nì tiyú'ú-de-ya. <sup>46</sup>Te chaá vai koyo jíin Judas-ún, nì kakatiin-de-ya. <sup>47</sup>Te ñin chaá kándii yúan, nì stáa-de machete-de. Te nì kachi-de so'o mozo máa sutú ñá'nu-ga. <sup>48</sup>Te nì ka'an Jesús jíin-de jíná'an-de: Nátu'un sikí ñin chaá

kuí'ná vái koyo-ró jíin machete jíin yúnu kátiin-ró rúu náún.

<sup>49</sup>Ndita'an kiví ní kandee-ri jíin-ró iní ve'e ii, ni stá'an-ri tu'un, te tú ní kákatiin-ró rúu. Ko súan kásá'a-ró náva'a ná skíkuu tutu ii, áchí-ya.

<sup>50</sup>Yúan-na te cháa káskuá'a jíin-yá, ni kaskéndo-de-ya. Te ni kajinu ndi'i-de kája'an-de. <sup>51</sup>Te iin suchí, ndikín-ya kuá'an-i jíin-yá. Te ndíi-i iin sa'ma kuítá, chí víchí líi-í. Te ni kákatiin-de-i. <sup>52</sup>Ko máá-i, ni xndóo-i sa'ma kuítá-ún. Te ni jinu víchí líi-í kua'an-i.

**Ja ní kandii Jesús nuu sutú ñá'nu-ga**

<sup>53</sup>Te ni kákinchaka-de Jesús nuu máá sutú ñá'nu-ga. Te taká sutu ñá'nu jíin cháa ni kayii jíin cháa káchaa tutu, ni kandutútú-de. <sup>54</sup>Te Pedro, jíká ndikín-de-ya ondé ini yuxé'é máá sutú ñá'nu-ga-ún. Te ni jungoo-de jíin cháa kájatíñu-ún, ndúvixi-de ñu'un. <sup>55</sup>Te taká sutu ñá'nu jíin taká cháa junta, ni kandúkú-de iin tu'un siki Jesús, ja ká'ni-dé-ya kákuñi-de. Ko tú ní káni'in-dé. <sup>56</sup>Chí kua'a-dé, ni kasátú'ún-de siki-yá. Ko tu'un ni kaka'an-de-ún, tú ní kété'an. <sup>57</sup>Yúan-na te ni kandukuiñi sava-de, ni kasátú'ún-de siki-yá: <sup>58</sup>Máá-ná, ni kajini-ná ká'an-de: Ruu, stúchaa-ri ve'e ii yá'a ja ní kasáva'a nda'a. Te nuu uní kiví te ndukani-ri inga ja tú níni jíin ndá'a, áchí-de, áchí jíiná'an. <sup>59</sup>Ko ni súan tú ní kété'an tu'un ni kaka'an. <sup>60</sup>Yúan-na te máá sutú ñá'nu-ga-ún, ni ndukuiñi-de kándii-de ma'ñú. Te ni jiká tu'un-de Jesús: Tú ka'an kuti-ro náún. Ndasa káka'an cháa yá'a siki-ro, áchí-de jíin-yá. <sup>61</sup>Te máá-yá, tú ní ká'an

kuti-yá. Te máá sutú ñá'nu-ga-ún, ni jiká tu'un tuku de-ya: Máá-ró kúu Cristo, Se'e máá I'a ii náún, áchí-de jíin-yá. <sup>62</sup>Te Jesús, ni ka'an-ya jíin-de: Máá-rí kúu. Te kuni-ro máá Sé'e cháa kunchaa-ya íchi ndává'a Dios nuu ío fuerza-ya. Te ndii-ya íchi ándívi jíin vikó nu'ún, áchí-ya. <sup>63</sup>Yúan-na te máá sutú ñá'nu-ga-ún, ni ndátá-ni-de sa'ma-dé. Te ni ka'an-de: Naún níni kúni so'o-yó ká'an inga-de núsáa. <sup>64</sup>Ni kajini-ro ná ndíva'a ká'an-de. Ndasa kájami ini-ro. Achí sutu ñá'nu-ga-ún. Te taká cháa-ún, ni kanakuxndii-de-ya ná kúu-ya. <sup>65</sup>Te sava-de, ni kativi sí'ví-de nuu-yá. Te ni kajasu-de nuu-yá. Te ni kaja'a-de jiki núu-yá. Te káka'an-de jíin-yá: Kani tu'un, áchí-de. Te cháa kájatíñu-ún, ni kastují-dé-ya jíin jiki.

**Ja tú ní játu'un Pedro**

<sup>66</sup>Te ichi chíi yuxé'é yúan kándii Pedro. Te iin ña'an játiñu nuu máá sutú ñá'nu-ga-ún, ni cháa-ña. <sup>67</sup>Te ni jini-ña núu Pedro kándii-de ndúvixi-de. Te ni ndakoto-ña núu-dé. Te ni ka'an-ña: Te róo, jíin Jesús nuu Nazaret jíká-ró vii, áchí-ña. <sup>68</sup>Ko máá-de, tú ní játu'un-de. Tú jini-ná, ni tú júku'un ini-ná naún ká'an-ní, áchí-de jíin-ña. Te ni kenda-de yuxé'é yata vé'e-ún. Te ni kana-ni lí'li. <sup>69</sup>Te ña'an játiñu-ún, ni jini-ña núu-dé inga jínu. Te ni ka'an-ña jíin cháa ká'jin yúan. Cháa yá'a suni tá'an-de, áchí-ña. <sup>70</sup>Ko máá-de, tú ní játu'un tuku-de. Te ni kunúu tuku. Te cháa ká'jin-ún, ni kaka'an tuku-de jíin Pedro: Jandaa ja súni tá'an-de kúu-ró, chí cháa galileo

kúu-ró. Te tu'un ká'an-ro súan kuní koo, áchí-de. <sup>71</sup>Ko máá-de, ni'in ni ka'an ndíva'a-de: Tú jiní-ri cháa yá'a ja káka'an-ro tú'un-de, áchí-de. <sup>72</sup>Yúan-na te ni kana-ni lí'li vuelta uu. Te Pedro, ni nuku'un iní-de taká tu'un ni ka'an Jesús jíin-de núú: Onde ná té kana-ga lí'li uu jínu, te ma kuátu'un-ró rúu uní jínu, áchí-ya sáá. Te ni nakani iní-de sikí tú'un-ún. Te ni nde'e-de.

### Ja kuá'an Jesús nuu Pilato

**15** Te jañá'an-ún, te taká sutu ñá'nu, jíin cháa ni kayii, jíin cháa káchaa tutu, jíin ndívii cháa junta, ni kaskétá'an-ni-de tu'un. Te ni kaju'ni-de Jesús kua'an-de jíin-yá. Te ni kaja'a-de-ya núu Pilato. <sup>2</sup>Te Pilato, ni jiká tu'un-de-ya: Máá-ró kúu Rey cháa judío náún, áchí-de. Te ni ka'an-ya: Ká'an ndaa-ro, áchí-ya jíin-de. <sup>3</sup>Te sutu ñá'nu-ún, ni'in ni kajikan-de kuachi sikí-yá. <sup>4</sup>Te Pilato, ni jiká tu'un tuku-de-ya: Tú ka'an kuti-ro náún. Nde'é, ná kua'a kuáchi kajikan-de sikí-ro, áchí-de jíin-yá. <sup>5</sup>Ko Jesús, tuká ní ká'an kuti-yá. Te ni naa iní Pilato ndé'é-de nuu-yá. <sup>6</sup>Te ío costumbre Pilato ja kivi víko-ún sía-de iin cháa yí'i vekaa, ñani cháa kákuu iní ñayivi. <sup>7</sup>Te ni io iin cháa nání-de Barrabás, kánde-de vekaa jíin tá'an-de ja ní kánda-de, ni kaja'ni-de ndíyi. <sup>8</sup>Te ni chakoyo kua'a ñayivi. Te ni kaka'an-i jíin Pilato ná sá'a-de nátu'un ío costumbre-de. <sup>9</sup>Te ni ka'an Pilato jíin-i: Kákuni-ro já sía-ri Rey cháa judío náún, áchí-de. <sup>10</sup>Chí a ni jiní-de ja ní kákuuásún iní sutu ñá'nu-ún, te yuán ní

kaja'a-ún-yá nuu-dé. <sup>11</sup>Chí sutu ñá'nu-ún, ni kaská'an-de ñayivi kuá'a-ún ja Pilato va'a-ga ná sía-de Barrabás ki'in. <sup>12</sup>Te ni ka'an tuku Pilato: Ndasá kákuni-ro já sá'a-ri jíin cháa káskúnání-ró Rey judío núsáá, áchí-de jíin-i. <sup>13</sup>Te máá-i, ni kákana jaa tuku-i: Kata kaa-ní cháa jian jiká cruz, áchí-i. <sup>14</sup>Ko Pilato, ni ka'an-de jíin-i: Naún kuachi ni sá'a-de, áchí-de. Te máá-i, ví'í-gá ni kákana jaa-i: Kata kaa-ní-de ná kúu-de, áchí-i. <sup>15</sup>Te Pilato, kuní-de ja ná kúsi iní ñayivi-ún. Te ni sía-de Barrabás kua'an. Yúan-na te ni xndó'o-de-ya. Te ni ja'a-de-ya kuíta kaa-ya já ná kúu-ya.

### Ja ní kasákátá soldado nuu-yá

<sup>16</sup>Yúan-na te soldado, ni káki'in-de-ya kuá'an-de jíin-yá iní ve'e palacio. Te ni kákana xini tá'an-de ni kánda-tútú-de. <sup>17</sup>Te ni kachu'un-de-ya iin sa'ma kuá'a tándí'í. Te ni katiin-de iin corona iñu. Te ni kachu'un-de xini-yá. <sup>18</sup>Yúan-na te ni kaka'an-de jíin-yá: Rey judío, taá ndii, áchí-de. <sup>19</sup>Te ni kakuun-de yunu xini-yá. Te ni kativi sí'ví-de nuu-yá. Te ni kajukuiñi jíití-de nuu-yá, te ni kachiñú'ún-de-ya. <sup>20</sup>Te nuu ni ndí'i ni kasákátá-de nuu-yá, te ni katava-dé sa'ma kuá'a tándí'í ñú'un-ya-ún. Te ni kánachu'un-de-ya sá'ma máá-yá, te ni kakeni'in-de-ya káta kaa-de-ya. <sup>21</sup>Te iin cháa nání-de Simón ñuu Cirene (táa Alejandro jíin Rufo kúu-de), ni ja'a-de vaí-de ichi rancho. Te ni katetíñu-de cháa-ún ki'in-de jíin-de kundiso-de cruz-ya. <sup>22</sup>Te kaja'an-de jíin-yá onde nuu nání Gólgota, ja

kuní ka'an: yiki xiní. <sup>23</sup>Te nì kasáká núu-de vino jíin súsia ua. Te nì kaja'a-de nuu-yá ko'o-ya. Ko máá-yá, tú ní játá'ú-yá ko'o-ya.

### Já ní kajata kaa-de-ya

<sup>24</sup>Te nì kajata kaa-de-ya jiká cruz. Te nì kasaka-dé sa'ma-yá nuu tá'an-de. Te nì kasá'a-de apuesto sikí, ndasa ni'in, iin iin-de. <sup>25</sup>Te ka'iin nì kajata kaa-de-ya. <sup>26</sup>Te nuu tutú kuachi sikí-yá yóso: Ya'á kúu Rey chaá judío, áchí. <sup>27</sup>Te nì kajata kaa-de uu ñakuí'ná jíin-yá, iin ichi ndáv'a-a-ya, te inga ichi ndávésé-yá. <sup>28</sup>Te nì skikuu tu'un ká'an tutuú ii: Ondé jíin cháa kándañáá ní kaskétá'an-de-ya, áchí. <sup>29</sup>Te ñayivi kája'a yúan, nì kaskuíkó-i xiní-í. Te nì kaka'an ndíva'a-i jíin-yá: Jan jaan. Róo, ká'an-ro já stúchaa-ro véle ii Dios, te nuu uní kiví te ndukani-ró núu. <sup>30</sup>Vina te nama-ró máá-ró, te nuu-ró jiká cruz núsáá vii, áchí-i. <sup>31</sup>Te suni súan nì kasákátá sutú ñá'nu-ún nuu-yá. Te kádatu'ún jíin cháa káchaa tutuú: Sava ñayivi á nì kuu nì nama-de, ko ma kúu nama-de máá-de. <sup>32</sup>Cristo, Rey chaá Israel, ná núu-de jiká cruz vina, te ná kuní-yo, te ná kándíja-yó, áchí. Te chaá kándíta kaa jíin-yá-ún, suni súan nì kaka'an ndíva'a-de jíin-yá. <sup>33</sup>Te nuu ní kuu ka'xiuu, te nì kuxkí'vì ní núu ñú'un onde ka'uní. <sup>34</sup>Te nuu ní kuu ka'uní, te nì ka'an jaa Jesús: Eloí, Eloí, lama sabactani, achí-ya. Já kuní ka'an: Dios máá-ná, Dios máá-ná, naja ní xndóo-ní náá. <sup>35</sup>Te sava chaá ká'iin yúan, nì kajini so'o-de. Te nì kaka'an-de: Nde'é, chí kána-de xiní Elías, áchí-de. <sup>36</sup>Te jínu iin

chaá nì jaa-de, te nì chindáji-de kachí núu vinagre. Te nì chaá-de xiní iin yunu. Te nì ja'a-de nuu-yá ja kó'o-ya. Te nì ka'an-de: Ná ndé'ó nú chaá Elías xnúu-de chaá, áchí-de. <sup>37</sup>Ko máá Jesús, nì ka'an jaa-ya. Te nì jí'i-ya. <sup>38</sup>Yúan-na te sa'ma ndíta kaa iní ve'e ii, nì te'nde uu onde nuu xiní te onde nuu já'a. <sup>39</sup>Te iin chaá capitán kándii-de nuu-yá. Te nì jini-de ja ní kana jaa-ya ní jí'i-ya. Te nì ka'an-de: Jandáa ja Sé'e Dios kúu chaá yá'a núu, áchí-de. <sup>40</sup>Te suni ká'iin sava ñasí'í kánde'e jíká-ña. Te yúan ká'iin María ñuu Magdala, jíin Salomé, jíin María náa José jíin Jacobo súchí. <sup>41</sup>Chí onde ná kánde-ya ñuu Galilea, te ña'an-ún, nì kandikin-ña-yá. Te nì kajatíñu-ña núu-yá. Te suni ío kua'a-gá-ña, nì kaja'an-ña jíin-yá ñuu Jerusalén. <sup>42</sup>Te nì ini kiví-ún. Te kásatu'a-de, chí yuchaan kúu kiví ndétatú. <sup>43</sup>Te José ñuu Arimatea, chaá kúñá'nu nuu junta kúu-de, te suni ñúkuu iní-de ja kúu ñuu nuu tá'ú Dios tiñu, nì chaá-de. Te nì chundéé iní-de nì kiví-de nuu Pilato. Te nì jikan-de yiki kúñu Jesús. <sup>44</sup>Te Pilato, tú kándíja-de ja á nì jí'i-ya. Te nì kana-de xiní capitán. Te nì jiká tu'ún-de chaá-ún nú a nì jí'i-ya. <sup>45</sup>Yúan-na te nì kundaá iní-de ja ní ka'an capitán-ún jíin-de. Te nì ja'a-de yiki kúñu-ya núu José. <sup>46</sup>Te José, nì jaan-de iin sa'ma kuítá. Te nì xnúu-de-ya. Te nì chisukun-dé-ya sá'ma-ún. Te nì chindee-de-ya iní ve'e añú ja ní jacha chí iin kava. Te nì stúu-dé iin yuu ní jasu-de yuv'e añú-ún. <sup>47</sup>Te María ñuu Magdala, jíin María náa José, nì kajini-ña núu ní jakin-de-ya.

**Ja ní nachaku Jesús**

**16** Te ni ini kivi ndétatú-ún. Te María nuu Magdala, jíin María náa Jacobo, jíin Salomé, ni kajaan-ña jí'lo vixi kichi'i-ña-yá. <sup>2</sup>Te jañá'an kivi iin semana, ja á ni kana ndikandii, ni jakoyo-ña núu vé'e añú. <sup>3</sup>Te káka'an máá-ña: Ndénu ní'in-yo iin chaa chaxio yuu yuvé'e añú, áchí-ña. <sup>4</sup>Te ni kandakoto-ña. Te ni kajini-ña ja á ni kuxio yuu-ún kua'an. Te ká'nu xaan. <sup>5</sup>Te ni kivi koyo-ña iní vé'e añú-ún. Te ni kajini-ña iin chaa súchí, nú'un káni-dé iin sa'ma kuíjín, kánchaa-de ichi ndává'a. Te ni kayu'ú-ña. <sup>6</sup>Te chaa-ún, ni ka'an-de jíin-ña: Ma yú'ú-ro. Kánandúkú-ró Jesús nuu Nazaret I'a ni jí'i jiká cruz. Túu-ya yá'a, chi a ni nachaku-ya. Yá'a nde'é-ró nú ní kajakin-de-ya. <sup>7</sup>Kuángoyo núsáá, te kachi-ro núu cháa káskuá'a jíin-yá, jíin núu Pedro, ja xná'an-ga-ya kí'in nuu Galilea vásá kí'in-ro. Yúan kuni-ro núu-yá, nátu'un ni ka'an-ya jíin-ró sáá, áchí-de jíin-ña. <sup>8</sup>Te máá-ña, kájinu-ña ní ndenda-ña vé'e añú. Chi káyu'ú-ña, te kákisi-i-ña. Te tú ni iin nuu ní kákachi-ña, chi káyu'ú-ña. <sup>9</sup>Te Jesús, a ni nachaku-ya máá jañá'an kivi iin semana. Te xná'núú-gá ni ndenda ndijin-ya núu María nuu Magdala. Ña'an-ún, ni yi'ia usiá tachi káni-ña. Te ni kiñi'in-ya kuá'an. <sup>10</sup>Te ni kee-ña kuá'an-ña. Te ni kachi-ña núu cháa ni kajika jíin-yá, chi kánduku'á ini-de te kánde'e-de.

<sup>11</sup>Te súan ni kajini tu'un-de ja chakú-ya ní jini ña'an-ún nuu-yá. Ko tú ní kákandíja-de tu'un ká'an-ña. <sup>12</sup>Te ni kuee-ga. Te inga modo ni nastá'an ndijin-ya máá-yá nuu úu-de kájika-de kua'an-de ichi rancho-de. <sup>13</sup>Te chaa-ún, ni kaja'an-de. Te ni kastu'ún-de nuu sáva-ga. Ko ni tú ní kákandíja ja káka'an-de.

**Ja kuáno'on-yá andívi**

<sup>14</sup>Yúan-na te vásá ní nastá'an ndijin-ya máá-yá nuu máá uxi iin-de, káxiukú-de káyee-dé staa. Te ni kana jíin-yá nuu-dé, chi ndava iní añú-de, te tú ní kákandíja-de tu'un ni kaka'an ja ní kajini nuu-yá ja ní nachaku-ya. <sup>15</sup>Te ni ka'an-ya jíin-de: Kuá'an jíná'an-ró níi náyivi, te kani-ró tú'un va'a-ri nuu táka ñayivi. <sup>16</sup>Chaa kándíja te kuanducha-dé, kaku-de. Ko chaa tú kándíja, ta'nu ndatu-de. <sup>17</sup>Te chaa kákandíja, sá'a-de tuni yá'a: Jíin sí'vi-rí kiñi'in-de tachi kiningoyo. Te ka'an-de inga yu'u jáá. <sup>18</sup>Kuanchaa-de koq, te nú ni jí'i-de veneno, te ma sá'a daño jíin-de. Te xndée-de nda'a-dé siki ñayivi kú'u, te nduva'a-i, áchí-ya jíin-de. <sup>19</sup>Yúan-na te nuu ní ndi'i ni ka'an máá Jíto'o-yo jíin-de jíná'an-de, te ni ndaa-ya kuáno'on-yá andívi. Te ni nungoo-ya ichi ndává'a Dios. <sup>20</sup>Te máá-de, kaja'an-de. Te ni kajani-de tu'un-ya táka lado. Te máá Jíto'o-yo, ni chindéé ní chituu-ya-dé. Te jíin tuni ni kasá'a-de-ún ni stá'an-ya ja ío ndaa taká tu'un yá'a. Amén.